

敦行

唐

廖洪家貧事親孝大中九年父母俱亡捧土為墳結草廬  
居有青蛇白獸來止廬側既有雁中箭墮于前洪為  
拔其箭以藥治之經宿而去咸通中縣令朱郁上其事  
詔旌

宋練為長沙掾四世同居以孝行聞咸通中觀察裴休表  
聞詔旌其門賜束帛

鄧文瑞四世同居五百餘口共爨長幼敦睦衣食無異開  
元中表其鄉曰旌義今玉虛觀即其故居

五代

沈麟字廷瑞性至孝友父彬死廬墓三年感慈烏集墓之

異

宋

胡仲堯字可宗華林人義居聚族雍正二年下詔旌表仲堯詣闕謝恩授國子助教遷國子典簿

陳友直字溫叔赤土人紹興乙丑進士官至朝散大夫通

判岳州性至孝父化光病涕泣繼之以血及歿廬墓三

年足不他履時天降甘露羣以異聞直不許淳祐九年

州守趙汝侓立祠祀之州學謚曰純孝姚勉有記

邱泰字義仲淳熙間父山疾篤泰刲股以進尋愈轉運副

使趙彥操聞于朝孝宗御筆書付史館後更名高

劉貞字祥可貴才之子生而穎異善讀書勇于聞道淳祐

壬子領江西解與同年姚雪坡同赴臨安居月餘作而

嘆曰人事如此天意可知遂假疾先歸明年姚大魁天

下而宋已不競矣前知勇退優游林泉自號竹林居士

臨安失守至元定鼎訪求者碩貞以疾辭堅不赴議者

以身名俱全許之

元

吳啟孫字誠甫南城禮義坊人百口共爨九世同居堪與

陳氏家風媲美至大壬子郡守吳公益奏聞旌表義門

卒祀鄉賢正德八年郡守鄺公璠以族孫珏能世其美

復書義門遺澤以旌之

塗源字源叟北城人早喪父事母幸氏盡孝延祐三年除知黎州以母老不欲赴強之出至州聞訃徒跣奔歸既葬廬墓三年

熊師說二十七都岡下人讀書孝友不事進取家故裕值歲歉輒調貧乏至元間撫州進賢飢告糴于其家發粟八十石賑之不受值其子志文克紹先志嘗出粟賑困及不能婚葬者人號之曰文山

陳天成字志升家少裕而能好禮創義學曰綠槐書院鄉黨宗族子弟貧而敏慧者聘師訓迪之仍給其廩餼因之成名者其眾閭里重之

冷齊賢喜讀書樂于為善至正間出粟賑貧賴以全活者甚眾里有虎患行者股慄捐貲募善射者捕殺之鄉里感其德號曰春山

明

陳鉉字鼎立荷山人明初父舜舉轉運京師以逋稅繫罪所司鉉年十四馳至京盡償所逋脫父以歸又盜將發母塚鉉怛怛心動若有告之者疾至墓所盜驚散以為神後子孫貴盛祥瞻創皆躋八座

鄒貞字吾省桂林人洪武間父為千戶長被誣拘刑曹待決貞年十三赴京擊登聞鼓願以身代得報就獄免父尋蒙恩宥減等發配甘肅衛軍後歸徵為義勇千戶以父邁謝冠終養僉憲教和上其事

吳仲二龍山人親死廬墓三年詔旌其門

謝麟字秀瑞下十二都前港人太學生正德壬申華林賊劫其家麟負母踰垣以避賊追尋益迫家人速之走麟曰母在顧可棄乎既而賊執其母麟奮力奪之母得逃免麟為賊所殺

吳雲字曰寶號鳳坡北城妙高坊人為府掾正德己卯從事別駕胡公署府事會儀賓李蕃李貴集叛黨助宸濠謀逆雲從胡公於石鼓潭擒之濠敗巡撫王文成公紀績奏聞奉旨免外考徑取赴京聽選雲以母老乞終養直指旌其孝恩賜冠帶族弟文端公贈聯云報國立功忠義實由天性養親辭祿孝思不假人為

吳氏瞻龍山人永樂間僉為千戶長管大木于湖湘督夫於閩地天順己卯歲歉輸粟助賑縣宰親詣其門奉旨立碑亭旌表尚義

徐會濟字碧泉徐坊人天順三年歲荒歉輸穀一千石賑贍飢者罷縣上其事題請建坊旌之給以七品冠帶

彭尚義米嶺唐源人天順四年輸穀一千石助賑題請賜坊旌表給以七品冠帶

吳琬字曰方龍山人父仁瞻性孝友敦風節琬克承先志積學勵行尊禮賢士周恤貧乏成化己亥邑大飢琬輸粟一千石助賑且為粥以待無告者鄉里徵輸無力捐貲代納不問所償巡撫金公澤題請監坊旌表尚義郡

縣屢舉賓筵後嗣貴盛

劉源瀟好古勤學長于詩詞治家有法本縣官糧與民糧均派起運百姓苦之源瀟問闕四千里伏闕奏請以官糧納輕折民困始蘓所著有蘓齋稿

鄒澗字容暉桂林人孝友端方立家範十則大有條理五子各營一宅創學田二百畝勸興來者宏治間郡守劉公廉其行兩請賓筵生平汲古好學晚築一軒貯圖史法帖以娛老區曰蘭室傳文穆公為之記

梁璧號方塘銅湖溪上人積學不求聞達重義好賢鄒南阜謫戍僻千里走書餽遺慰問南阜手答云使公當路吾道豈憂不行哉隆慶三年歲饑璧首捐粟三百石入

義倉備賑郡守鄧公高其義稱方塘先生尤以才名重當時著有方塘集

劉公泰性孝友好施與成化庚子歲飢輸粟六百石助賑正德間年百歲副使李夢陽檄府立坊

吳斗瞻龍山人讀書明大義好善樂施成化己亥歲大歉助粟賑濟全活甚多邑令顧純以其事上聞撫軍金公澤奏請恩賜冠帶建坊旌表

鄭再廉米嶺江背人隆慶六年捐粟千石助賑縣令楊思明上其事題旌尚義

胡克安石街人篤學隱居歲凶出粟賑飢華林寇亂克安身帥六子溥激潔漢深洙及里中義勇禦之寇獲其三

子潔兄弟五人偕前爭死寇義而並釋之寇平郡守胡公旌其閭曰忠義之門

朱以範號茶山社山人景賜元孫吾弼之曾祖也嘉靖甲申納糧救旱戶部尚書王題請授以七品散官邑令重其賢能委以釋民事稱平允華林盜起範督鄉兵助平之居家孝友子姪均析其產人皆義之今登科甲者皆其後嗣

張進字子與國學生嘉靖甲辰歲飢莩者載道進施粥以濟郡守嘉其義後判沅州以良吏稱

張本榮楊文華嘉靖癸卯郡守許仁卿建修石橋遂知義者十人二人先之

朱崇遂號竹亭年二十棄舉子業潛心理學萬歷戊子邑中飢疫崇遂破產調恤鄉里免流亡者二千餘家撫按欲上其事力辭早歲艱嗣鄉人禱曰朱某生平善行而終絕嗣乎未幾連舉二子朝綬朝縉皆擅才名多隱德曾孫軾為大學士

幸國賢慷慨好義居家嚴肅孝友著於鄉遇荒捐賑閭里德之三舉賓宴子姪能承其志勒名旌善亭稱世善孟應乾城西人萬歷甲寅歲大飢輸粟助賑旌尚義名勒府署碑記

傅友城西人萬歷十六年輸粟二百石賑飢太守章公潤邑令李公磯匾旌

傅廣潤國學生珠湖人萬歷間值解南米捐貲三百往省  
部告折府縣旌其門曰尚義後子孫傳膠庠登賢書皆潤諱之力

李應明西南廂人讀書好義每遇荒年出有餘以贖貧乏  
巡按陳公于廷給匾旌之

劉廷興一都人高年善行萬歷間邑令陳繼昌給匾優獎  
朱應洪正己長子性恬淡動遵禮法同母弟繼祖出守楚

雄諸子聯翩甲第人皆艷之洪獨卜築良溪之濱蓬戶  
蕭然嘯歌自娛甚有隱德為良溪始祖

陳樾字遠隆赤土人賦性端恪事父母備極孝謹尤友愛  
諸弟嘗受易于丁竹山奮志力學數奇不售時世宗下  
採木之命于江南樾父窶以邑推行誼當行樾請以身

代不許寢獨攜僕走閩山遂觸瘴歸病故官錢半為無  
賴所侵沒樾痛父死于役往任厥事至傾貲償費凡五

載暴露風濤始得報竣同事者多罹罪畧而樾獨課功  
保業以終父志歲荒邑令以禮聘董賑事傾私廩以濟

全活甚眾不受冠帶後以子儒貴累贈中憲大夫  
朱繼通性豪邁母龔氏早卒繼母鄔氏嚴而戾通與妻黃

曲意事之務得其歡心糾族合祠終其身不令里中有  
訟嘗戒子司李必忠厚正直無為我受一絲一粟後以

子吾弼貴贈太僕卿

吳勁字子松號晚翠南城禮義坊人痛母梁早寡膳養備  
至行賞金陵時天寒會設羊羔酒動念慈闈潛然淚下

高州縣志 卷一 七  
明日遊報恩寺誓斷酒肉及歸母病湯藥弗愈剝股肉  
為糜湯以進乃甦郡守鄺公匾其門曰節孝

朱達善字兼之教諭以和之子生而孝友教諭在沛達善  
忽心動急馳至則母病甚日侍飲食晝夜勞瘁而母竟  
不起哀毀過禮遂成羸病及父致仕歸達善問寢視膳  
有古孝子風事庶母馬氏如所生其妻欲為廣嗣買妾  
羅氏女以憶母故悲愴達善即日返之不索原聘他若  
賑粟建橋置義田善行不一郡守嘉之舉鄉飲者五  
况于杞字汝器幼以孝聞父母歿欲以身殉哀毀幾絕服  
闋以明經將赴選冒雨哭墓遂抱疾以歿

劉緒祥字南屏一都人少以畊鑿起家足不入城市睦姻  
任卹物望蔚起兄弟子孫並列兩庠多端士每庭集鬚  
鬢皤然不辨昭穆年百歲視聽聰明待人謙遜士大夫  
就問者疑有導引之術曰無一靜而已嘗舉鄉飲郡守  
贈之曰盛世嘉賓

幸鳴鶴字徹元洪城人循循孝友無疾言遠色終身讀書  
不事進取娛意山水著有濱谷集方外襍錄編釋松垣  
文集華林記畧補遺

吳一恂字惟德號仰泉南城禮義坊人文端公仲子也文  
端請朱太母就養不得遲迴不行太母促之官乃詢諸  
子誰代予晨昏者恂獨唯文端心喜既行而恂以善  
養稱母年八十文端乞歸世宗方嚮用不許及母九十



請歸養又不許詔賜存問久之得請見母健飯心喜恂之能代養也文端以三公承膝下歡恂奉義方惟謹咸謂倫常樂事云

朱繼德達善之子任正定經歷有能聲署藁城令甚得民心以親老乞養歸攀轅不忍其去後丁父憂奉母孝敬備至敦睦族黨內外無間言建飛仙等橋十餘處為善不倦子吾楫事嫡母最孝以弟子員入監授光祿署丞並以善稱

袁文煥幼孤與弟文道文謨並敦孝友有古義門風歲饑輸粟三百石助賑散藥施棺直指獎之書名旌善亭文道以辦事選衛經歷不就官好行其德修兩戒解南折

建允倉改官運悉捐貲以董其成好讀書著有樂畊篇郡守周公舉鄉飲文謨事母尤恭謹戊子大荒首倡出粟賑飢及卒侍御曹汝蘭銘其墓曰惟孝友于為仁之本雖曰未學純乎其純

王錫騏獨城人天性孝友篤行好修家產悉讓諸弟與子宗軻甘守窮約騏後軻六年而歿家徒四壁惟督課幼孫一鶚期于有成後鶚成進士

傅文冠珠湖人年十四母楊氏病篤諸醫弗效割股以進得甦郡守馬公維陞賜額冲齡至性直指聞其事有孝可維風之旌屢額粟帛

朱吾瞻號幼岡社山人吾弼之弟有聲庠序與兄弼極相

友愛朝夕相依嘗曰吾兩人同胞他日終亦必同藏及弼宦江南贍營佳城得黃公坪牛眠地重價購之形家有為贍子孫計者贍曰吾敢以自私乎乃預築塚壙讓先居上位當事重之舉鄉飲介賓年八十子孫科甲甚盛

諶之芳高郵市人崇正間因父病劇籲天割股愈之未幾再病芳嫂張氏夫外出亦焚香割股署府張公大烈上其事有一門雙孝之旌

朱吾菁幼失怙母黃氏貧寡茹苦菁忍飢歡母稍長力畊為養後黃疾篤菁禱天割股以汁進母稍甦汁盡求肉哽咽不下菁哀痛呼天恍若人指下喉間者遂延數年

邑令聞而旌之

鄒漁號禹壑桂林人父復軻師表一方漁承家訓篤行力學與弟涖從弟演一庭孝友涖訓子詩有經史生涯需豹變之句漁續云聖狂歸路判雞鳴榜為壁聯晚歲坎

坷素位自安士林重之年八十八終  
幸逢明字晉卿素儻潛心經史補邑弟子員生平潔已好修志不欺物晚樂遊山水與姪鳴鶴輩覽勝聯吟人皆方之阮謝

幸金昱字文煥洪城人淹貫經史德孚于鄉子棟榘補諸生昱晚甘恬退教太史文正有聖代崇儒術徵君被寵綸之贈朱太僕為之傳

鄧元輔字見虞庫溪人十八父歿母失明朝夕侍養不離  
 生平樂施予嘗于飢歲捐數百金活人不索償子應鞫  
 辛酉恩選官至二千石次子應宿將貢而折初應鞫宰  
 清源元輔遺以詩有勿近脂膏懷暮夜恒持清白報君  
 親之句故所至有聲及告養歸天倫之樂里中稱最年  
 八十五卒

熊灼號來鳳廷相子補諸生壯志弗售日以墨莊屬其子  
 性激昂不苟同流俗裘馬翩翩饒有元龍之氣以子坊  
 任鳳陽同知左遷懷來通判贈如其官

楊士信號助我大路人邑諸生與朱太僕同遊劉承訥之  
 門初治易後師大叅陳公改授禮記學行兩優隱居衡

泌間好善樂施孫運泰御俱補弟子員

陳偉字子立號叅寰赤土人父松輕財重然諾歲戊己大  
 饑出粟二千石賑恤閭里有子五人信儁侷侃而偉其  
 幼子也風格秀整弱冠補邑諸生于經史百家兵農禮  
 樂燈史道藏靡所不究九試棘闈中萬厯丙午副車雖  
 壯志弗售而閉戶樂天居然有靖節風味晚與兄鑒韋  
 詩歌唱和簡質沖淡直追漢魏生子四長龍中順治辛  
 丑武進士

傅明應字國興菱湖人嘉靖戊午鄉試第二時年十五父

繼孟容滇南毋歐陽氏寢疾不起日夜侍側憂形于色  
 然湯藥餘閒仍讀書不倦尤潛心理學師事鄒東郭羅

念菴二先生得其要領伯兄早逝撫孤不啻已出倡構  
宗祠置祭田復解囊以贍族之貧者時奉旨廉天下孝  
行江西四人明應居其一將徵用之尋因父喪冒暑而  
卒士論高之

劉躍龍字禹門一都人補邑庠不屑屑帖括家言日以窮  
理格物為務從子九嶷年纔舞勺早以大儒期之子九  
功九式九臯有聲諸生兩餽膠庠每戒曰學貴正心脩  
身非區區獵青紫已也嗜菜根者何人爾曹其勉之年  
七十三卒著有周易解家政格言九臯早亡著有歷代  
鑑斷數十卷

徐天開字萬生城北人邑廩生將貢以恬淡自放索居田

間課研授讀戴木冠自號無一道人先登榮補諸生崇  
正間從戎任萬載守備棄去遠引如出一轍

朱賢字間生古塘人邑諸生方領矩步言笑不苟屢困棘  
闈閉戶督課五子俱遊泮珊以壬戌進士改庶吉士賢  
生平樂善好施丙丁奇荒出粟給賑賴以全活者無算  
凡境內橋梁多其修葺

徐邦濟字庄甫北里人磊落自命才敏識捷甲午汰浮多  
方區畫心力俱瘁生平和藹近人見斃獨必濟過愈爭  
必解尤善延師擇友仲子遷早捷

徐之來字子華城北人慷慨重然諾尺寸準于度尤趨事  
急公崇正乙亥增修城池屬之來經紀不辭况瘁且捐

囊以助署郡張公大烈嘉其勞賜額優獎孫珩甲午登  
賢書

李梁棟字擎宇朝陽門人都諫旭之裔孫雅度端方雍雍  
仁讓不以田宅乖骨肉周急解紛見稱同里魏守史公  
躬盛賜額旌之八十三卒孫文燦癸卯登賢書

胡一梅字樂沂陳家湖人仲雲後裔好圖史敦氣誼一時  
名流多慕之晚年樂善不倦子起龍登鄉薦

劉裕顯字世範金沙臺人性豪邁負膂力有馳馬試劍之  
概不屑屑章句拓落自喜破產不恤少時路拾金俟尋  
者至還之旁笑其迂顯曰此區區者能損吾志耶教二  
子成名與一時文人聚則平原十日或歌或泣人不知

其所託焉

胡思泰字裕吾朝天坊人端直有度好周人急力盡則鬻  
產繼之有遺金于道者候其人還之口不言德生平與  
物無競雖居城足不入公府邑令蔡國光優獎之年九  
十二子翊聖邑諸生

張應龍號繼山朝天坊人個儻善經畫以賞甲里中好施  
予尤喜交名流崇正庚辰督學侯公賜額優獎順治丁  
亥歲歉仲子鑣捐貲收瘞巡方旌善季子鑑慷慨有父  
風孫起鳳丙午武科

胡思廣號淡菴陳家湖人仲雲裔孫好讀書制行高潔不  
苟取與居家孝友延名師課子年三十失偶終身不娶

開戶咏歌有古人遺風子從順郡廩生

王鼎乾號愛松仁南鄉人幼失怙事母盡孝就學弗給棄

而為商置別廬于姑蘇山塘歲一返舍度母所需必市

歸以進母卒有以卜兆惑其停柩者泣而拒之攜子尚

卿之吳越間延名師課之後以丙戌魁江省生平樂施

子慷慨然諾邑令蔡國光題其居曰百行可師

羅城字自宗北城人性孝友父兄先喪事母盡瘁承歡產

今諸季以一人肩其任撫孤姪婚配之人高其義居嘗

博綜世務一切兵農鹽鐵水旱灾情罔不究心甲午汰

浮賦科則手編有功年八十三卒子璵孫士觀補諸生

陳堯佐號慕隣赤土人由祖徙居治東天性孝文跬步不

苟因操觚弗就志切課子好與名流交尤放情山水以

遠市蠶為快癖嗜易一日玩困謙二卦義嘆曰聖人所

謂寡過信在斯矣孺子勉之虞鄉黨中温温豈樂遇紛

必解天崇間郡守樓公楊公先後賜額以彰潛德卒年

六十九子補邑庠

王文魁字文宇城南人温恭豈弟敬士尊賢性樂施與一

絲一粟必與諸啼號者共邑值汰浮奔走竭賞不惜晚

歲食貧課子督畊陶然終老邑人賢之子道生遠補郡

庠生

鄔思德號德宇昴溪人性謹厚慤而直慷慨自立宗黨咸

敬服之好營繕綽有條理延名師課其子應星郡庠生

應斗丙午魁武榜年六十七終

劉嗣燧字述吾一都人孝友性成好義樂善鄉隣有急必造其廬相倚為命丁亥歲荒無告者多德之有長者遺

風子兆鵬邑諸生

陳彥洙字賓城朝天坊人素性端厚搵履無玷捐修社學開井利汲賑饑施棺拾遺還主院司道府給匾冠帶旌之八十五卒孫列庠者九人

鄧立德字克明縣下人性耿介有古遺直風晚年樂善不倦人以長者呼之年八十三終

徐天賑號少軒仁濟坊人性謹愿有先民遺風尤好行其德平生施與無親疎有不足者成周之倡立宗祠為子

弟約規模可法天啟間郡縣三舉介賓卒年七十七終

政陳公誌其墓

曾大旺字益吾四十六都人好善樂施橋梁多其修葺晚年歲靜修不問外事年七十三子宗聖希聖邑庠生

李文範字子式三山人幼業詩書長敦孝友閭里有善信之稱年八十終

羅仕登字實陽北東廂人制行端方言論不苟為鄉里所重戊子秋大兵駐筠陽竭蹶計備鄉城得以安堵邑令勞之七十八卒子俊邑庠生

袁一本字筠池景行坊人賦性質樸立品端方居市井恬淡自安司馬馮公廉其耆德委以施粥濟飢不繼捐已

粟助之賴活者衆有善行可嘉之與年七十五卒

洪鼎字調元好善樂施享年九十有九子蓋年九十七孫

雷年九十三萬歷間郡守陶公旌曰世壽

吳文朗字介夫南城人性孝友少習儒業經史性理素問

靈樞無不淹貫後乃以醫顯常存濟人之心諸當事敬

禮贈曰理學名醫生平介然不事干謁終日垂簾手不

釋卷人稱觀瀾先生年八十一終

楊評字正宇朝天坊人里門尚義克敦孝友丁亥奇荒散

粟賑饑賴以存活者無算凡有稱貧不能償者悉焚

其券義方垂訓甚有家法孫茂松補弟子員年八十九

終

李仕彬字少厓三山人賦性恬淡視躬雅飭事親以色養

宗族雍和尤好施樂善不倦年九十卒

丁必瑞號博峯丁坊人好學嗜古循謹持躬温恭接物每

立志以自期許延師以課子孫著有舉業要論集行世

歲飢捐粟賑活者不可數計署守孫公高其義旌曰德

可範俗享年九十孫士元魁庠士正邑宰正恪遵祖訓

克全孝友篤學勵行言笑不苟丁亥奇荒施棺濟饑遠

近利賴同族尤厚助之曾孫鳴殿鳴鑾時發俱補諸生

畧領丁酉鄉薦

楊大朝字繼嶠湖西人有韜畧萬歷間應劉總戎之聘川

征奏捷欲以都閫用辭弗就語人曰得一官不如名一



藝受其業者多能人蜀楚間傳其姓字著有匡時要藝歌附武經末年八九終

吳之用字以策龍山人祖文輝好學多隱德父夢弼至性纏綿咸奉為人倫規範之用承庭訓孝友克敦嘗戒子扶賜震暘曰吾家以儒世其業從無遺行汝曹大行無虧方是聖賢真種子著有家範足為世法今孫支馨纓不墜是其遺澤云

劉一葵一都人母吳氏寢疾百方不效葵瀕天割股命婦烹進母遂愈署府余公旌以節愍縣令蔡公有節孝重光之褒

王朝元字仁吾赤岸人罷庠生章之祖也性長厚好施捐貲收瘞崇正間邑令蔡國光屢優獎之

廖循鑫八都人庠生萬英之父丙子奇荒鄉隣困乏者多方救濟里人德之

李統鐸西南廂人好行善遇荒輸粟備賑崇正間左藩潘公宗絃給匾優獎

熊夢吉字子祥北城太學生性恬淡不謁選與一時賢達琴酒交歡家故裕而義不苟取一切施舍每為邑中首倡不干譽不任德一以長者目之直指李公優獎善行卒之前自諷吉集親友宴會區畫得宜正襟危坐而逝年七十三

陳貞字伯承筠溪人性慷慨憂邁不屑屑章句築別館簡

名傳課子生平喜談俠烈讀易水歌則掀髯起舞明季奮臂從戎以材官任守府楚寇蹂躪仗劍走粵西竭家齋糧以從兩廣撫軍方心齋寄之未能竟其志以歿識者義之子補郡增生

戴相字三錫城南人少負才華十九補弟子員慷慨自命甲申闖變閉戶二十餘年而卒著有坎坎集聽鷗小草等編

談國猷號錦南城南人為邑諸生恂恂謹厚不苟言笑居開市寧靜自守皓首窮經士林重之學政陸公給匾優獎

况紹美字達生琛之裔孫垂髫補弟子員屢困棘闈遂超

然物外日與名流繙經釋史旁及花鳥譜牘不手箋垂暮精禪學緝有心經獨解辛丑偕諸門人登高唱和歸無疾而卒年八十三

蕭繼善號筠石蕭坊人孝讓成性名著膠庠慷慨樂施有古麥舟之風丁亥竒荒族中多菜色計口給粟賴以舉火者甚眾復為粥于路以起溝瘠學使趙公獎優行郡守張公丌義以積學高年褒之子時敷領歲薦時習領鄉薦孫家軾家徽景何補諸生

丁煥明字東園丁坊人正德間華林寇變隨郡守廊公璠賫軍糧後平服有功事聞賜以八品冠帶匾曰智畧可嘉塔熊相立有傳贊

鄧文昌英塘冷水人捐粟助賑太守田公詳請優獎  
王乾為邑累虛賦走京奏請蠲免闔邑德之

諶宜律 十一都人 况大堅 二十五都人

張仲旭 三十都人 况大新 二十五都人

張制民 三十都人 胡克行 十八都人

况思哲 七都人 熊瑛 二十四都斜溪西塘人

胡伯澄 三十五都人 盧銓 十八都人

楊景和 下坊人 洪仕武 在城人

謝伯誠 右城人 廖郁全 在城人

單玉器 三都人 劉宗文 一都人

沈伯鑾 七都石城人 王懋 七都人

况大江 十五都人 朱倫音 三都人

况大器 二十五都人 藍碧江 三都人

謝尚儀 七都菟田人 藍碧澗 三都人

黃大常 三都人 陳子儀 小湖人

謝象山 七都槐山人天順間納粟旌為義民正德間納銀授宣德郎

吳曰芳 南城禮義坊人 葛天民 元妙觀人

鄒清佑 桂林人 胡仲 南城人

王尚政 四十五都赤岸人 熊堯伯 岡下人

熊美 陳亮工 庠生

塗時敏 省祭 袁臺

釋普誠 靈泉寺僧

以上自正統至萬歷捐粟助賑立石旌義及有功于  
邑者張志載于尚義聶志附敦行之末今仍之

傅興性至孝父疾感夢百里外徒跣求醫得撫州絕嶺古  
井水調藥而愈祖母曹氏孀居為華林賊所掠欲殺之  
興渡水以救賊用巨鏡壓之鏡忽斷賊驚異釋之事聞  
詔冠帶表其門舊志失載通志增入

國朝

胡士璉字白生市南人博學強記文章德行一時同人矜  
式食餼二十餘年屢試冠軍辛亥纂修邑乘與同邑陳  
九疇鄒篤生胡惟聖陳之璠共事文昌宮垂竣冒暑抱  
病是年當歲貢先二月而逝門人梁吉弔以二絕云邑

書小小試三長一卷椽花記室心博得垂成山豎矚知  
君討論太精詳窮經已是費年年堪嘆功名一篲邊公  
案到頭懸仕學倩人能不信因緣

朱極光號北坡崇遂之孫軾之父幼孤食貧藉館穀以養  
母承色笑如嬰兒拮据甘脆不令母知困憊狀性儉樸  
而敦厚生平無疾言遠色雖犯不校自軾通籍後立宗  
祠置祭田設義學刊譜系修塚墓之無主而祀者葺道  
路梁笈之傾壞者汲汲行善至老不倦所謂不于其身  
必于其子孫信然

陳世齡字小房荷山人邦儀孫家學淵源天資穎異早入  
郡庠性至孝晨夕膝下不忍稍違三十年如一日著有

縉翠園存稿子守創仕至都御史

鄭俠字繪臣米嶺山背人稟性穎異甫受書輒能了大義十九補博士弟子員入棘闈十次不售嘗聚徒講學于米山成就後進甚衆孫領鄉薦

傅文龍字允明珠湖人郡廩生生而奇偉具經濟才弱冠時捐粟賑飢族兄文華器重之後隨之五任汝城書築拯溺全活甚衆別築起虞館日以琴書自坊東三身之昶慕之題其室曰琴書清趣

吳以策字對臣龍山人文學夢諫季子也夢諫力學未遇以策稟庭訓博極羣書值明政日非謝棄舉業甲申闈難聞吉水李公邦華同郡吳公甘來殉節郡城為文哭

之自是屏絕毫翰惟讀書不少倦延師課子篤修內行事親孝與人忠伯兄誤以丹術致疾穢不可近以策朝夕扶持裳衣皆親為澣滌康熙甲寅滇藩倡逆草竊蔓延以策謂釜鱗易殲也團聚鄉勇為堵禦計族人雖屢櫻賊鋒頗受其毒而官長皆欽忠義馬晚年喜讀左氏春秋鄉居數十載足蹟不入城市惟二三耆舊及諸名士相與尊酒論文而已年七十六雍正元年以

覃恩勅贈登仕郎臨川李公紱表其墓文載穆堂初稿子為名宿為名進士為學博有河東三鳳之稱

陳天文字簡而號潔齋赤土人父許捷有文名生文甫十二年而歿文幼即克承父志隨伯父郡庠生嶽肄業家

事賴有扶持弱冠補弟子員屢試棘闈得而復失遂淡  
意進取以砥行立節為務檢身若不及遇人忿爭捐貲  
排解邑令林運鑑聞其名得其鄉詞牒不遽判決必先  
質之郡伯劉公柟嘗式其廬舉賓飲獎以達尊有二額  
人以為文之生平足以當之以孫書過貶贈奉直大夫  
熊文炳字伯子鄆峯人邑庠性豪邁尚書崇尚風節見  
義勇為其放有少俠父以聘室幾為憂家勢奪炳以撫  
孤為己任訟至司費及千金無少悔終得完聚且厚為  
之所丙丁奇荒罄其所積賑粥數十餘日全活無算甲  
乙間里中壯勇逐穢棚寇時奸猾索賄不遂中以危法  
炳毅然赴訴以豁一鄉之累至今稱道不衰其敬禮賢

哲延名師以課子孫至老不倦五子遊泮者四長明經

### 孫曾濟濟庠序

武定遠字二超號介菴米嶺人性穎慧善讀書幼時誤入  
虎穴驚仆地虎眈視良久退避莫之傷人因此異之厚  
相期許髫年試臨江補弟子員順治間隣邑盜賊侵境  
遠倡起團練募鄉勇于雞埗隘口為都人堵禦計者極  
周生平雅好佳山水米嶺龍潭之勝多所題咏子三兩  
貢太學孫枝明經庠序彬彬有人卒年五十五

陳紹曦字日暉赤土上官庄人祖渭川父良翰皆以文學  
顯曦幼失怙受經于祖祖卒遂棄舉子業家故豐深知  
貲財不可過積念張子疲癯殘疾皆吾兄弟顛連之義

一以恤惠為事順治丙戌奇荒施粥于員福寺兩月活人無算嘗病天瘡濱于死者數次夢三神人指吞神案淨水而愈人以為隱德之報

陳其源字奇清赤土洲上人性謹愿而氣概不凡少年嘗市鹽肆客誤投粟鹽多于值數十倍歸始知亟持還之道拾鬻子者金坐以待遺者遺者甘謝以半源曰吾利汝金何故待汝而受半乎其不苟于財類如此至今子孫皆蜚聲鬻序卜貽謀之遠焉

梁鳳相字秀卿溪上人為人魁梧奇偉慷慨好義物我無間喜怒不形族有五十無子者相為之娶妻以續嗣康熙甲子家廟火延兩廂私室相獨出金重修公私復業倡捐修廟以妥神靈厥後代登賢書乃其積厚云

傅國植字培因珠湖人生平正直自持為宗族所矜式其先世以仕宦顯植賦性冲淡幼攻舉業累試不售遂絕意功名優游泉石日以古籍自娛年踰八十手不釋卷著有書經精義參用鄭孔諸說以補蔡傳所未盡後裔皆以尚書成名

劉榮遐字名卿一都藍溪人天性孝友盡色養以事繼母讓田宅以善同氣尊賢重士濟急扶危嘗曰積金積粟何如積善手蓄餘貲盡行散給概不責償有券者輒焚之鄉里稱善人有乃祖宋長者平伯遺風年八十三無疾而終子孫入庠登科者稱盛于時

劉顯璋字士宜西陽人郡諸生博綜羣書尤熟左國公穀為古文與不尚浮華孝友性成曾徒步往豫省奔父柩歸葬禮儀兼至里中縉紳先生咸重之生平尚氣節凡有義舉力為成之晚年閉戶著書諄諄以修行立品訓後人卒年六十七

謝敦立字道生六都稠塘人性敏嗜學過目成誦幼失怙遂棄舉子業理家政然猶手不釋卷每有所得欣然自適不屑屑以財產為務擇師教子成名生平居心仁厚立品端方與弟敦創怡怡一堂待人以恕鄉評高之子以明通榜任永新教諭迎養新人士咸景仰焉年七十卒

鄭仲爻字天伯米嶺人少貧苦自安義命起家勤儉以詩書為貽謀以禮義為家則以周急扶危解紛息爭為已任鄉黨推重方之王彥方陳太邱馬年八十二四子皆顯達

童成達字志道西溪人居家嚴謹行已端方足不入市城好善樂施孳孳不倦施棺賑貧修橋道不一而足凡有義舉無不倡先鄉里稱之乾隆元年舉鄉飲僕賓學政金公有仁心素著善行可風之褒卒年七十七

陳曰錫字天授米嶺廟前人生平端莊素著善氣迎人事親以孝聞待弟姪親愛誠篤延師課訓多所成就凡學中膏火不繼者時為資助康熙三十五年歲大旱罄所



積穀減價糶之邑令劉旌以時雨之化郡伯趙公以樂善不倦褒之乙未舉鄉飲子孫稱盛年八十二卒

龔文臣字質先遠江人性誠樸不欺幽隱嘗拾遺金坐待以還樂施濟而恥受美名鄉人重其行舉鄉飲卒年八十有六子遵

陳曰陞字維臣米嶺前埔人少負才不羈習舉業未售遂

嘯傲烟霞翛然自得生平所結契者多學行有德之士敦請名師敬禮有加子早逝教育孫曹成名登科卒食其報年未三十喪偶終身不復娶年九十卒

來世隆字敬字南城市南人性謙和孝友稱于鄉黨歲歉里中之食不能全活者減食分粟以給之子孝養善成

其志乃由牛路卜居市南家道益隆子姓甚眾嗣孫習儒業有貢成均者

傅四美字具卿珠湖人世有令德性慈祥喜施予言笑不苟稱善行者人無間言延師課子入膠庠登仕籍者彬彬稱盛

姚國璣字衡玉太學生由貼市堆卜居城北碧落巷幼穎異邁眾長而慷慨有遠畧性喜親賢友善言坊行表族黨奉為典型延師課子後裔登科者稱盛既歿太守楊公廷翼聞其碩德述其事跡為之傳贊以表之

曾萬璞字幼和平湖人素敦孝友重然諾家素豐性喜施予晚年析爨存腴田六十餘畝蓄租十載散給貧民以

充食又蓄十載製絮被千餘散以禦寒惠及于人不可數計囑身後以此田送學後裔果成其志今子姓繁衍科貢甚盛

梁倚雲字雲際銅湖人性敏異嗜學補郡庠父鍾石以節義終雲居喪盡禮事母承歡養志誼篤友于課弟有成庭無間言

熊開書字雲瑞二十七都港上人端方誠懇推重一方康熙乙未遠遊鹽邑宿旅舍遇某因債負欲嫁其妻夫婦哭甚哀書詢知其故傾囊以贈謂其子曰此事但可以語爾曹若揚于外是以小意沽名也邑令祝元仁廉其賢直旌

盧大濟字博施十六都冷塘人好善樂施凡力所能為者不惜費桐山橋圯捐資數百金獨任其事康熙癸酉丙子歲歉設粥以食孤貧出粟以賑窮乏鄰里德之濟五世一人至子生五孫登仕籍者有人

敖遊字枚及十三都龍城人淹貫經史崇尚志節儷于庠幾二十年恬然不求進取乃踈農作山居賦以見志

黃裳字文中上二十都寮山人家頗裕性好施予鄉族窮乏者多周恤之橋路傾圯無不修補冬設薑湯夏設茶水以濟行人有某負債鬻妻為代償以全其家室有稱貸不能償者即焚其券卒年七十三子繼其志人稱世

善

敦行

三

劉兆露字潤之鈞山人幼孤且貧慷慨自許性慈祥于阡  
危疾苦若不忍見聞者援例選刑部司獄感然曰囹圄  
桎梏非吉祥地也耳濡目染久之恐窒吾心矣遂以疾  
辭竟不之官歸隱督課子以賢達顯樂善好施至老不  
倦年八十終

王炳字君弼號湖川十五都湖東人勤學好義嘗著四書  
詩經講義及詩古文詞不以問世凡橋梁寺宇額圮必  
拮据以勸其成年八十二以諸生老

鄭璜字渭玉米嶺人由庠生入太學天性孝友重任卹家  
故饒鄉黨賴之周急族有貧不能娶者助之以延其似  
續晚築松軒延名師課子不欲以財損其志取人所未

償券悉焚之郡伯史公隨高其德舉鄉飲介賓年七十五  
卒

熊士通字天受郭峯燕山人性孝友慷慨處鄉黨極和易  
家庭又甚嚴肅隣里有爭必捐貲以解矜孤恤寡扶危  
濟困不可勝計見里中興梁將圮躍然有重新之志未  
幾疾作易箴時惟以所書為囑子貢成均能竟其志云  
梁天衢字行遠溪上人生平孝友敬老尊賢敦請名師課  
讀凡一言一行有物有恒可為鄉黨矜式郡伯朱公一  
鳳舉鄉飲卒年七十子皆成名

廖科升字聚之城南上坊人節婦黃氏孫也孝友性成仁  
讓素著家素封延師課子而外惟以儉樸自安及濟貧

極困又極慷慨康熙乙未兩學公舉鄉飲輿論稱之後嗣多以科貢顯

武世璉字仲玉米嶺起頭人父習舉子業二弟幼獨任家事數十年毫無私蓄慷慨好義嘗有攜妻孥居遠地而不能歸者捐貲使復其故里他如平坎珂架橋墩施棺瘞骨所費不措癸酉歲歉將所餘粟分給族鄰不計其償家法嚴肅訓子若孫惟以讀書為事子貢明經孫皆入庠序七十九卒

熊任遠字宏毅艮山人幼穎異博洽羣書屢試未售乃樂志林泉陶情詩酒有五柳遺風家法謹嚴子若孫曾輩皆其親課正躬範俗為鄉里所推重年九十筋力康健朱文端公匾贈之郡伯旌以道鐸化彰乾隆八年舉賓筵子亦成名

陳國直字伯卿灰埠人天性肫摯品行端方為隣里所重嘗戒其子曰人有餘積貴于能施若推之以周困乏斯為善用其財不然何為多此長物也子克遵父訓拯危濟急一無慘色直享年八十二子亦七十餘後裔甚盛雷光贊字公育畬里人品行端穆有古人風博洽經史探漁洛闢閩之學躬行實踐樂賑貧乏修仙溪德美二橋以便行李舍旁薤山有虎為文祭之逸去闢斯園學舍購圖書數千卷以德行文章訓子孫著有友蘭齋集子舉鄉飲孫登賢書

何世仰迂溪人幼習舉業敦孝行家貧竭力奉親父母病

兩次割股救瘡及歿廬墓三年公舉孝子邑令有懿孝

堪傳之獎藩司旌以孝行可風年八十餘子孫蕃盛

陳守昂字定臣城南小街口人郡庠生讀書嗜古至老不

倦事父母孝養備至歿則廬墓不忍去事二兄極其愛

敬久而不衰兄亡撫諸姪若已子生平道義自閑性樂

恬淡足鮮出戶戊午鄉闈首薦未售後裔以科貢顯

鄭和諫字文式米嶺綠溪人為人和平樂易事親以色養

延師敬禮有加尤樂施子康熙庚寅有廣民遺其病子

于綠溪橋畔而去者諫憐其無依攜至家衣食而醫治

之獲痊逾年其父至諫給資遣歸其行事類如此年七

十三隱几而逝長子獲雋

王士麒字瑞伯由赤岸遷居南城連通坊幼習儒業通大

義長遊吳楚間所至推為端人正士晚年家居博購經

史督課子孫俱食餼膠庠聲稱藉甚考授徵仕郎部銓

廣東經歷以年耄不就教家有法立庭除模範四條後

世恪守多長厚風

吳必顯字淑謨龍山人刺史文光四世孫由例監考授州

同資性醇樸極孝友尚氣節凡有義舉捐資倡率不少

護生平賑貧恤孤排難解紛鄉黨倚之課子惟以讀書

立品為期一時薦紳先生咸引重之

鄒延樸字實臣院嶺人性至孝事父母婉容愉色飲食供

奉非親所嗜不敢進舉動必稟命而行服勞不少留餘  
力延師課子情文備至益得親心歡宗黨重之康熙戊  
子鄉飲介賓邑令張漢翹匾旌齒德兼尊子孫以科貢  
顯

孟子孺字公錫城西人醇樸孝友慎交遊重然諾少習舉  
業屢試不售遂絕意功名延名儒督課後裔長子馳聲  
黌序次子給冠帶孫復繼志年八十七終

曹永章字元卿七都溧溪人天性和藹喜交賢士沉酣書  
史樂志林泉生平有隱德凡稱貸不能償者悉焚其券  
鄉黨咸感賴之邑令給匾優獎後裔成名年八十八卒  
彭孫鵬字和臣二十五都彭家渡人幼孤事母至孝行

端方重然諾喜施予楮幣賑貧不可勝計有某負債欲  
賣妻以償鵬聞而止之且解囊以贖其家鄉人高之邑  
令祝元仁匾旌德重鄉評子幼年入庠序

武啟峻字克明四十一都南浦人少懷高尚嘗遊江湖旅  
次武陵有某負豪債陷獄將鬻妻峻聞為傾金以償得  
免某願以身報不許癸亥荒歉發粟以賑窮乏全活者  
甚夥族中有貧不能完娶者女家欲他適峻為之納幣  
訂期里中子姪有穎而貧者給膏火佐之多所造就已  
已冬舉鄉飲僕賓郡伯沈公旌以式範鄉閭邑令祝景  
顯旌以耆年碩德子亦成名

謝倫誼字弼臣二十七都溪頭人性孝友好學嗜古數奇

弗售篤志延師以課子孫賑貧乏睦宗族五世同居著  
有家訓後裔以科甲顯

黃朝正字周臣漾塘人補弟子員善積于躬行孚于物乾  
隆八年兩學公舉鄉飲稱為紫陽遺範康樂雅操

曾學繡字錦成四都平湖人倜儻岐嶷早失怙弟幼遂廢  
舉子業理家事課弟成名又為族黨置公產設義學以  
資貧不能從師者生平敬禮賢士立品端方孝友著于

鄉里

楊鴻績字太常三山人三歲失恃伶仃孤苦賴祖母撫育  
之後祖母病不省人事者三月績衣不解帶侍湯藥晝  
夜不倦一日禱天願以身代孝心感格祖母壽延一紀

鄉里錄其事上之太守范公大成旌以孝養堪勵

劉夢松字惕若西陽人岐嶷英偉深沉簡重弱冠補弟子  
員沉潛經史蘊鹽自適屢試未售遂僑寓章門借名市  
隱交遊多名俊酒酣賦詩豪曠絕倫晚年督子孫力學

過公事義氣凜然方之古汲長孺陶士行近焉

朱辨古塘人制行端方篤於天性事父母備極色養承顏  
順志有古孝子風母孝婦張氏患氣疾求醫禱神侍湯  
藥歲餘晨昏不怠母卒衰經終制不入私室服除設主  
淨室飲食必薦而後嘗父棠卒盡哀盡禮亦如喪母郡  
伯沈公區旌孝行可嘉邑令陳旌以孝德世貽祝元仁  
旌以孝義可風生節義之門克敦孝行可謂無愧先德

矣

姚國琛字如玉筠北貼市堆人賦質魁偉秉性誠樸重然諾好施予自少至老樂善不倦太守沈公以一鄉善士請標其名于旌善亭其畧云睦族和隣教子課孫循循禮法年踰耄耄實為里黨儀型子孫相繼登科者甚盛童會伍上二十都人住北城三公舖父早喪家貧事母極孝母病親嘗母糞百計求醫康熙五十二年邑令唐匾旌孝行足尚郡守趙公旌以誠孝可風撫軍佟公旌以孝行可嘉

朱日暉字正陽一都清湖人性孝友磊落不凡少負遠畧凡有義舉不惜精力以身徇任甲申歲歎多方周卸族

黨賴之家庭訓誨諄諄以忠孝廉節為躬行實踐之本

邑令劉祉旌其廬後嗣昌盛

陳永偉字德公赤土人父發新南昌郡諸生明進士儒之元孫也家世無白丁偉高隱弗耀勵志篤行孝友出于天性年三十失偶義不再娶慕范文正風倡姪文善齊璵捐新建唐家坊田為義田高郵市鮎魚洲為義洲以贍子姪之貧乏生平以不愧衾影存心歲終必焚香告天以祈降監子食餼孫入泮是其報也

龔一祥字瑞宇遼江人歲貢全華子性孝友慷慨樂施有鄉人某貧不自給欲鬻妻以償債其妻不從赴水祥聞救之給銀米以全其夫婦之好順治丁亥大飢賑穀施



粥賴以全活者甚眾鄉人德之號曰義翁順治五年由吏員考職選山西陽曲縣丞未仕而卒子十多賢

劉達旨字季美西陽人個儻豪邁好讀史漢論古有奇趣壯志弗售縱遊名勝都會結納賢豪家居極盡孝友嘗

出粟賑貧乏尤喜培植人材構西園精舍延名師命子姓親友肄業其中成名者甚眾當事舉賓筵太守劉公

高其行贈曰宿德鄉儀年七十卒

胡宏肇字卓之下坊陳家湖人少承庭訓勤學好問至老不衰性溫恭無疾言遽色家居孝友事繼母盡得歡心

從子幼失怙撫字成立如所生鄉黨隣里通其有無不計酬賞周禮六行其庶幾乎雍正八年舉應傑賓子員

鄉薦

劉崇桂字攀之西陽人性孝友剛直好善嫉惡不少假借養二親必拮据求得其歡心經營所獲公諸弟無私財

嗣是家聲漸振尊賢禮士遇鄉里困窮必多方周卹至老惟以讀書積善訓子孫以至成名

熊鐸肇字振玉二十六都寨口人讀書好善敦倫勸學修宗祠禮賢士督課後嗣嚴而有法人以貧苦疾厄告者

多方濟之至老不倦處橫逆恬然無不平之色署邑令徐士鑑聞其賢親式其廬贈以楷模一方兩學公舉賓

筵

黃應傳字安若九都燥岡人為嚴氣正性剛直自矢人

有爭者是非不阿私所好無不相說以解家頗裕時以利濟為心修橋路建宗祠悉解囊獨任無吝色延師課讀情文兼至子孫從姪多列庠序

冷克教字敷五二十七都前坊人性慷慨好行其德所蓄餘貲輒以分贍族人之貧乏者居側有溪架木為梁曰袞秀橋圯壞無常捐貲砌石成利賴之延師課子姪禮敬備至後嗣成名

冷紹容字泰昇前坊人生平樂善不倦凡可濟人利物者無不竭力為之埋醜掩骼尤加意焉每遇春畊出種子食穀待人不計其償人皆德之

謝文顯字大力七都槐山人自幼恂恂守禮法愛親敬長本乎天性及長益教善行排難解紛雖破產不惜尤尊賢禮士延師課子必以義方子列名太學

陳煒德字文華赤土上官庄人襲祖父貲輕財帛習舉子業不售遂以醫藥濟世凡隣族之貧者絕弗與較生平以不欺自己不負他人自視臨終謂其子曰汝心所可欲為之勿以無利而不為汝心所不可欲勿為勿以有利而為之

周文板字厥祥二都坑南人生平寡言笑薄嗜慾尊師重道課子成名性至孝母病湯藥弗效割股以進遂甦遇水旱灾出粟以濟不計其償解人爭訟全人室家傾囊亦所不惜修治橋路往來賴之

單振蒙字聖功瀚塘人為人慷慨多大節敦重嚴毅望者輒起憚心然相與勿欺接人惟勸以善人亦不見忌尤篤于親親情義兼盡未嘗以財產措意生平尊師敬士子孫並列膠庠耄年舉鄉飲

朱師締字天如坡山港背人秉性剝方不隨時俗俯仰遇顛連無告者輒深憫惜施棺掩骼賑粟濟貧排難解紛不畱餘力雍正十二年舉鄉飲僕賓當事有公平服物之褒年七十八終子孫入庠序貢成均者衆

傅賚泗字源遠山畬人品行端方敦厚渾樸言笑不苟讀書樂道恬如也有餘貲積而能散族里多德之延師教子入庠序卒年七十七

吳朝昇字日升黃溪人性質樸耿介篤好書史彬彬然有古人風延師訓子由郡庠貢成均賑貧恤乏鄉黨待而舉火者咸頌其德

朱壙字叔輝北坡第三子幼聰慧博洽羣書為文雄放自成一家二十貢太學庶子副車以兄弟皆宦遊侍親膝下遂不作功名想備極孝養得堂上歡族姓有紛難片言立剖慷慨仗義遇人急輒助之嘗構別業積圖書數萬卷良朋集益其中善摹古法帖作署書尤道勁間涉筆為繪事潑墨成趣與夫岐黃堪輿之學悉為究心丁母艱服闋省伯兄軾于京師值水利營田事兄曰吾家受

恩深重可不為

朝廷効力乎曠從之年滿議叙以知縣用然意不在于得官也伯兄軾抱沉疴數月曠夙夜憂勞調湯藥不一假手童僕足跡未嘗出戶友愛出于至性晚年喜讀宋儒性理書病劇猶誦近思錄不置子領雍正癸卯鄉薦任福建永春知縣

何天植字與叅伍橋馬山人讀書夙慧持已端嚴郡司馬李公延為西席鄉闈屢薦弗售乃薄意進取間遊山水歎曰此波平石瘦正吾本色耳邑令林賢而禮之每稱高風可擬澹臺著有惕堂家訓醒樓文集

方足式子接踵登科學博吳公之倫薦舉介賓卒年七十六

涂應奎三十二都郭峯人性剛方取介淡泊寡營少習舉子業未售遂不求進取見人有善行雖卑幼必加敬禮人有過必婉言曲喻以俟其自新數十年中惟以訓子課孫為事孫遂以成名卒年七十

蕭萬翔字雲軻二十四都港北人生平篤孝友敦行誼渾厚誠樸有古人風排難解紛不惜已費尤好施予有稱貸不能償者悉焚其券鄉里重之治家嚴肅勤于訓課子郡庠生

劉發玠字祥玉一都左橋人孝友因心忠厚成性生平無

疾言遽色咸以長者稱之排難解紛不遺餘力濟人利物不惜傾囊太守李公現秀旌以凌雪喬松縣令朱沛然旌以耆英望重卒年九十

何識魯字曾若號怡齋任橋人幼喪父惟母兄是依孝友天成性好學湛深經術不屑屑章句弱冠補郡弟子員食廩餼屢戰棘闈不售遂無意科目日以娛親恭兄課子為務每恨不及事父故以怙名其齋為人慷慨仗義鄉黨有疑難羣取質焉惜其文章經濟未展屢用疊志以歿子為名宿為部郎其裕後宜也

黃應超字及升五都瀚溪人邑廩章蔚子幼穎異出羣善為文性甘恬淡不求進取生平秉禮守義鄉黨不族稱善人無間言後嗣不墜其志

謝倫堂字上庠洛社人質性純粹弱冠補弟子員居家教授生徒循循善誘門下多知名士立品端方尤為士林楷模鄉評高之年七十陳木齋先生為文表其懿行

鄔應奎字宿野鼎溪人性孝友由諸生貢成均考授縣丞以母老弟幼不欲遠仕為族置祭田修家譜隣有鬻其妻者奎力止之贈以金族某誤娶遠方有夫之婦奎令遣還并出贖為族人婚嘗道遇孀婦家貧子幼無所依誓以死殉奎曰此真烈婦也傾囊贖之曾買幼僕不知為良家子授室生子其親屬持金以贖即還其夫妻子女而卻其贖金其善行類如此

彭子瓚字廷玉南城錦水人世居彭家渡父始卜居于城  
幼恂謹孝友恭讓本天性少習舉業未遂勵志督課子  
若孫期于有成品概端方足以範世太守朱公一鳳聞  
其賢贈曰謙光足式孫曾皆列序

吳獻持字謙士黃溪人幼孤母蔡氏守節奉養以孝稱制  
行高潔喜施予遇有急難告者不惜傾囊以紓其困路  
拾遺金俟其人還之康熙甲寅賊寇猖獗捐金倡義集  
鄉勇為捍禦計一方賴以安全郡守劉公登科優獎之  
其後孫登賢書篋膠序

吳學源字本思龍山人幼籍諸生至性脆篤母陳氏患手  
疽針治未愈源抱持痛哭侍年餘衣不解帶康熙庚子  
以貢授廬陵訓導勤課程敦古學更念老父鄉居無能  
迎養歲請于太守一歸省馬雍正甲辰陞太原縣丞就  
道之日長跪號泣不忍去父珍慰之曰忠孝一理汝但  
勉圖報効無失民望即無貽親慮也抵任後茹藥飲冰  
以文學飾吏事有爭訟者委曲開陳人皆悔悟時西陲  
用兵委解甘餉數十萬溽暑馳驅刻期竣事感病抵署  
數日而卒伏枕哀鳴猶以不能終養為憾晉藩高公成  
齡太原郡守金公鉷聞訃悼惜各賜輓章踈視日太原  
士民白衣冠號送盈衢巷馬

劉教昌字敷五西陽人孝友素著品行端方尤博洽經史  
為文力追先正遇事必繩以禮法而不阿所私人見而

高安縣志 卷十五  
憚之久而服其誠生平以讀書尚志為事邑令李修卿  
高其品旌曰儒林篤行所著有寬齋文稿

熊懋瑚字夏玉翼之子南城仁濟坊人幼穎異博通書史  
以明經選授安福司鐸為人恭謹簡重孝行播聞綜其  
生平總以厚道為主故合郡稱其有古人風曾孫科甲  
簪纓甚盛

朱棠字流膏古唐人郡庠生三歲失怙及長事母以孝聞  
性醇厚品行端方樂善好施犯而不校在庠五十三年  
規行矩步終身無失德士林重之乾隆十五年

詔舉善行郡伯沈公闡上之錄其名于旌善亭贈曰儒林雅  
望一日無疾正衣冠而卒年七十八

武世弼字亮臣米嶺起頭人積學未售遂循例貢成均孝  
友著聞好施樂善損修橋路子孫能繼其志

彭經訓字傳人米嶺東華人補弟子員卒如例貢事親孝  
好行善事丁亥戊子歲比不登發粟分給族隣不責償  
他如架橋施棺延醫給藥不惜多金人有爭捐金排解  
延師誦讀倍極殷勤附學寒士資以膏火成就者多年  
六十五卒子孫甚盛

謝麟書字聖瑞觀溪人幼習舉業母病親侍湯藥七載無  
間昆季雖多不以少寬已責生平慷慨慕義士林無不  
重之陳木齋先生歌詩以贈郡伯沈公闡聞其篤行敦  
倫旌曰德音是茂

蕭士琦蕭坊人天性孝友父歿哀泣幾于喪明事母能以色養飲食必親調以進兄弟怡怡聚順一堂人有緩急輒為軫恤族黨賢之長子太學生能繼其志癸亥大飢罄所積粟以貸不責其償可謂世德云

黃榮祖字仁則翰溪人入太學考授主簿性孝友其父應超耄而勤學榮祖曲體親心不以家計擾之日用所需獨力經營不辭勞瘁弟由諸生貢成均皆佐讀功

謝敦儼字若思溪頭人賦性倜儻有遠畧托跡廛市結納賢豪聲譽四達常以元宗為念弟姪輩鄉聯會捷成就之力居多

王士滿號松林赤岸人性極孝友幼貧苦失怙復避兄嫂

亡滿一人負土營邱拮据殆盡勤勞畝畝以養孀親撫孤姪授室析產無異所生遇歲旱彼獨稔古所稱兩粟兩金天之貺孝子者類如斯乎郡守沈公瀾邑令陳來元嘉其行乾隆丙寅久舉鄉飲子皆貢成均

潘子場字廣源上二十都石山人六歲而孤竭力事母病篤百藥不効乃割股炊糜以進頓瘳後以天年終嘗遊荆楚見客死無歸者屢捐貲瘞之有潘善人之目

陳大榮字及先國學生七都石馬城人嗜學敦行八世同居食指千數內肅外雍榮克承先志以勿私勿刻勿疑勿惰立家訓四則弟姪子孫皆能恪守有江州義門遺風



陳文煥字大章安溪人行誼高潔好學嗜古補邑弟子員  
因數竒不偶遂精于醫全活甚衆郡伯劉公楠邑令朱  
沛然皆獎之著有傳心錄九種醫學周行恒齋墨餘溪  
西集

朱震字育萬三十都東港人生平端方誠懇有古君子風  
幼英敏勵學貢成均鄉試不售遂棄舉子業遊江浙諸  
郡凡知名之士無不樂與友晚年歸里築別墅督課子  
孫又為族衆設義田延名師以引後進助以膏火楮墨  
費修橋平路利濟往來不一而足兩學舉鄉飲孫登仕  
籍考衆

朱仁余字寵受黃塘大岡下人郡庠生潛心博覽以數奇

艱于進取遂淡意功名篤志課子訓以義方睦族和隣  
息爭解忿日以為善是樂年七十舉鄉飲介賓

彭良楫字巨源北城碧落山人太學生幼習經書以數竒  
遂遍遊荆楚間與一時知名士往來酬答聲名藉甚生  
平每以不遂素志為歉卒之夕以立品讀書囑後嗣者  
再三為人孝友謙冲和厚排難解紛慷慨然諾縉紳先  
生多引重之後裔登仕藉

傅國用字三若珠湖人邑庠生性醇謹持躬凝重居家不  
踰禮法諄諄以義方訓後嗣好學嗜古垂暮手不釋卷  
尤樂善好施予郡伯邱公璋以譽隆金玉旌之邑令張  
漢翊旌以品重儒林年七十舉介賓

孟輔國字萬選城西人孝友性成賦秉淳樸素耿介寡言  
笑重然諾待人以謙與物無競有忿爭不解者多方解  
囊釋之里黨稱善郡伯沈公瀾旌以表善鄉閭邑令朱  
沛然旌以名重筠陽穆元春旌以仁厚可嘉太守陳公  
士璠旌以德邵齡高年七十猶恂謹自持加意課子週  
卹貧乏樂善不倦云

袁日祥字發臣太平門人生平尚義樂施予癸亥歲歉乏  
食捐穀數百石周濟里黨方伯彭公家屏旌以利濟桑  
梓辛未荒又捐米減價鄉隣德之郡伯綬公蘭旌以善  
行足風壬申舉鄉飲邑令聶元善以觀國之光獎之  
六一濱字聖陶南城桂林坊人五世列膠庠濱博覽書籍

以恬退自尚至孝性成父病危醫藥罔效朝夕祈禱願  
減已年以增父算父果越一紀而歿後嗣不墜家聲年  
七十太守朱公一鳳重其行贈以壽徵餘慶

程世錢字萬青朝天坊人至誠服物利濟存心丙子歲歉  
族中不能舉火者鬻產分給之後家漸落至老食貧怡  
然自安隣里咸高之

常以銓字司衡常家巷人性耿介立品端方以勤儉起家  
乾隆癸亥米價昂出所蓄以散給宗族不計償尤尊賢  
禮士延師課讀恭敬備至署令張彤梁贈曰碩德可風  
後嗣甚盛多列膠庠

陳發新字天英赤土人明進士儒曾孫也母孕十四月而

生穎異非常年十四即補南郡弟子員崇正壬午沈應  
旦充同考試官擬上上卷薦之因爭元拂總裁意置之  
遂隱遯與翠巖古雪虎洞張逍遙為方外遊性孝友而  
樂施與母病刲股弟亡撫孤人有急難見輒周之鐫躬  
行心得四字圖章以自勵南州名進士饒行萬喻子羽  
輩不輕可人獨推服發新著有雷雲集佛齒百韻

羅繡字公恒上暹崗人國學生性好學淹貫經史凡事關  
網紀者必毅然自任常以節義激勵人心一時名下士  
爭相結納著有燦霞詩集

陳六經字漢士安溪馬埠人十九補弟子員益肆力於學  
性恬淡屢困棘闈蕭然自得暮歲行愈修太守李公雲  
根重之延為鄉飲介賓

朱淳字紹程一都清湖人秉姿穎異以數竒不遇循例入  
太學生平正直持躬公平服物慷慨仗義義氣迎人為  
鄉黨推重年未六十而卒

陳文翰字藩臣六經從姪早歲入庠序家素裕性好義遇  
族隣難處事輒慷慨直前不吝解囊家業中落怡然以  
終著有書經體註

謝廷訓字成我溪頭人郡增生循循孝友潛心經史寒暑  
不輟生平廉介足不履公門郡伯邑令見其善行舉鄉  
飲介賓

劉榮景字晚翠一都羅苑人邑庠生九章子初業儒困童

子試乃精醫施藥于人不計償歲飢賑濟鄉鄰勅書院置學田以啓後至老不衰

劉基操字啓名一都塘背人性孝友奉公惟謹率衆義畜依限輸糧使數十年無追呼之擾建茶亭修橋路周急解難不惜已費立家訓以約束子姪後嗣繁衍登賢書列庠序貢成均者衆年九十二終

鄧志銓字淑其北城仙桂坊人移居南鄉隆室里性孝友母病侍湯藥寢食俱廢早喪父諸弟賴其成立人有以非禮加之不與較人服其量

皮芳字蘭室菱塘人生而穎異幼失怙從事叔孝廉國裕勤學能文數竒不售寄情歌咏好行義隣有解襦以償

適者傾囊以全其家室五十舉一子後嗣蕃盛

甘我鍾字英人三十四都雙溪人天姿渾樸氣度醇謹事父母孺慕依依至老一如孩提時居鄉黨然諾不欺排紛解難每以貲財假手他人而自隱其名乾隆六年舉鄉飲郡伯朱公一鳳旌以望重鄉邦子入膠庠貢明經孫曾甚盛

游夢祥字古詹三十二都溪頭人性純粹年十二剝股療父病人稱純孝尤好施予有負者輒焚其券延師課讀程督倍嚴子入成均孫列庠序

涂大功字榮我四十二都楓林人為人正直公平鄉黨推重雍正間舉農官

戴嘉明字元臣南城上坊人事親孝敬備至為族鄰矜式性耿介取與不苟遇人有急難解囊周卹不遺餘力令孫曾菴盛

胡光曙字昭也下塘中巷人性孝友居家嚴肅恒以禮法自繩檢子姪循循規矩能樹其家聲鄉黨重之

梁家郁字周文太學生性至孝康熙乙未父以漢銓次患病郁聞之步行至京延醫調治乃愈後漢補山東棲霞令侍親佐其廬能生平氣概豪爽急公尚義不屑居家計族隣有不平解囊排釋無不信服

洪燮字贊卿會上人幼苦志力學二十補邑庠父樹廷卒于外燮走千里扶柩歸哀毀骨立賦性端方言笑不苟凡後學從遊者多聞人素不佞佛著有闢異傳暮年營一圃自號槐叟優游以終子品領已酉鄉薦

徐昌祚字繩儒城南人少聰穎過目成誦十六補郡庠食廩餼屢試冠軍性剛毅遇地方公務利弊倡首公言邑中累浮賦崇正間偕里人走虔州懇于按臺徐公養心力懇疏減壬午冬左兵駐筠人民震怖祚身任調劑兩城始獲安堵至順治甲午將屆貢期先一月以疾卒弟姪俱以衣冠繼其後

丁鳴陞字俞之丁坊人邑庠生性孝友潛心經史寒暑不輟生平足不履公門年八十六卒長子旭次子冕俱補弟子員

謝祖潤字雲龍七都菟田人生平尊賢禮士睦族和鄰尤精于醫時以利物濟人存心子入庠序

彭來遠字悅生米嶺塘源人邑庠生幹臣子幼習舉業未售遂隱居獨善敦倫睦族樂善好施歲飢出粟以賑貧乏乾隆壬申郡伯綏公蘭舉鄉飲子貢成均孫入庠序

彭聖訓塘源人生平志潔行芳孝友兼盡慷慨仗義倡修宗祠本里大僊橋地力為捐修庭訓整嚴一堂雍穆乾隆甲戌郡伯陳公士璠舉鄉飲以上六人舊志補遺

歐陽瓚字中黃號玉齋北城碧落巷人康熙丁酉科武魁性豪邁好施予嘗捨棺以殮貧者凡有公舉皆能潔已捐貲乾隆甲戌修邑乘經理有方尤尊師重道慇懃

訓課後裔今子若姪遊膠庠登科第者接踵其長男子

乾隆甲寅 恩科

欽賜舉人乙卯 恩科  
欽賜翰林院檢討

朱大年字明遠四都清潭人性豪爽善屬文素履修潔正直不阿壯謝制舉力課後嗣行年八十三忽偕孫曹就童子試與熊生年十三者並補弟子員督學曹賞其文喜贈以詩白頭黃口兩儵然採得芹香喜並肩論長豈惟應父事同升祇合作兄先蒼松色借春花映唯鳳翎隨老鶴翩可憶古稀初度日總當小子始生年旋躋增廣其子孫列膠序者接踵卒年八十有六

徐宁字敷在城南仁濟坊人幼嗜學博識多聞屢試棘闈

不得志乃家居課子孫以力學敦品為先性好施有負債者將鬻妻問其數即解囊代償一日視某病某驚曰曩所欠今病不能償願來世以報笑荅曰余視汝病非問汝欠也為市藥併取所質衣物還之更周以粟凡先賢格言鏤板廣布郡侯沈公澗邑侯祝公景灝舉行引年之典請為介賓有居心長厚立品端方無愧成均堪膺介選之獎子有聲庠序孫一官廣東清道司一官雲南嶺峩縣尉曾孫辛酉壬戌聯捷進士任翰林院庶常吳銓字遴選城南石橋人習舉業未遂厥志以例貢成均生平剛方成性樂善好施嘗買一僕頗識人意後欲歸里銓即給還身券並贈以貲生平好義大率類此以故

後裔文學濟濟科第綿綿皆厚德之所致也

傅廷詔字匡臣二十一都珠湖人幼失怙事母至孝專心儒業屢試未售有弟早喪撫姪猶子教養倍如同里有負債貧不能償者立焚其券凡解釋紛爭若切已事務得和洽而後安其倡首施茶至老不倦又屬細行耳以故子孫繁衍多列膠庠

王錫瑞字信玉以例授叅軍南城石橋人少孤苦竭力事祖父母又事嫡母如己母育楊氏子教婚畢即令歸宗鄰有嫁妻還債者概出數十金代償併給本銀以資生理他如施棺掩骼當暑散茶催僧拾字善行不可勝紀後夫婦八旬偕老同時無病而終子列膠庠後嗣昌盛

羣嘆為厚德之報

李子能字恒茂桂塘港里人為人公直天性肫摯父病子能曉夜扶持衣不解帶者三載病寢劇乃焚香默禱割股和藥以進雖蹈愚名不惜也已而父病亦尋愈

吳學源字遠及城南石橋人志潔行芳孝友兼盡乾隆十二年南城多圯塌郡守沈公瀾延紳士修理源捐貲勸助潔已奉公時同事悉奉為典型焉子若孫列膠庠者四貢成均者五舉孝廉膺選拔人俱頌其方興未艾云曾星昇字智萬北鄉洋源人幼失怙事母至孝即菽水必盡歡待兄弟以友愛處族隣以謙和而又好行其德乙酉歲飢盡出所積之穀以借貧人不收其利鄉人德之

卒年六十有三子貢成均亦善繼志

姚進祥字瑞臣城北貼市堆人素性孝友品行端方雖近城市足跡未嘗一至公門惟以詩書裕後為惓惓而善行又有以培之故子中乾隆丁卯武科諸孫三膺鄉薦孫曾亦並列膠庠愈云厚德所報

陳興齋字慎三北城碧落巷人事父母以孝聞昆季八人友愛無間尤慷慨好義一夕將寢有無賴子入室行竊獲之因曰汝為饑寒起見求人賙濟可耳奈何為此敗名事轉給銀數兩其人感愧卒為正人生平長厚多類此今子孫貢成均列膠庠咸以為長厚之報云

陳任號崙峯赤土人幼凜義方之訓長遊黌序之中輕賞



財重然諾交遊稱其信遠近懷其德雖鄉試屢薦未售  
直視為遺然之數卒以子貴贈奉直大夫制曰善積於  
身祥開厥後洵哉

藍裕字佑啟白馬林人幼習舉業積學能文雖屢試不售  
精進之志老而勿懈為人孝友性成力敦古道家非富  
有遇以貧苦告者輒推解之不少吝凡所言行皆可為  
鄉里矜式所謂讀書立品良足當之

傅國煌字輝若二十一都珠湖人性忠直疎財慕義嘗置  
學田百餘畝為試讀費為人謀能全終始值公事雖艱  
鉅毫不遜謝鄰里重之

張慈雲字五彩三湖崗上人性好恬靜事父母以孝稱力

敦友誼和睦鄉黨人敬重之享年九十有五二四五嗣  
悉登仕籍僉以為忠厚之報

張誠字重玉太學生烏高山人醇謹謙和慷慨尚義人以  
橫逆相加不與校濟困扶危無德色家居督課子孫甚  
嚴今多入膠庠

汪世浩字宏若四都汝塘人性孝友寡言笑雖童穉敬憚  
之家貧甚延師課讀却甚豐潔子史百家出自手抄者  
盈篋族建祖祠賞費千數百金付浩總理毫無間言邑  
令劉承甫匾贈耆德可風其子孫列科目書香繼美皆  
以為餘慶所致

何珊字海樹南塘人太學生少失怙事母極其孝敬諸弟

幼弱教讀婚配悉引為己任後弟姪子孫成名者接踵皆珊之力也且四世同爨入其庭闈詬誶不聞世莫不共欣云

戴九錫字榮鈞南城上坊人也忠厚性成雖處城南無浮囂氣古道照人咸以長者稱之遇紛爭則多方排釋庶不帖然其至誠動人有如此宜後嗣之克昌云

王茂炳字虎章太學生官莊人性至孝友于日篤居裏坦白從不設城府待人人亦鮮有欺之者遇歲飢輒出園廩減價以便民貧者併不計值他如焚券之舉推解之行尤不一而足鄉里無不高其品目卒年六十有八子貢成均

胡傳焜字秋伯市南人幼失怙恃事後母極孝性豪邁不事產業入都求進階與同里朱子珊友善後珊以考功掾銓太原丞病卒於晉焜聞訃走數千里扶珊骨以歸珊母德之欲以女妻焉焜曰施勞望報不義珊母曰有德不酬亦不義也於是買塋塋珊厚聘而妻之鄰有貧而鬻妻者焜助以貲而止卹孤扶弱不遺餘力遇士林尤禮重焉募年中落堅志督課孫以選貢任知縣曾孫登丙午鄉荐

吳楷字端模太學生城南石橋人孝友性成慷慨仗義所至搢紳先生皆爭重之乾隆乙酉歲黜買穀賑飢所全活者無計子二長列郡庠次入太學弟姪以科名顯皆

公培養之力焉

常士倬字雲章號慎齋太學生南城常家巷人性淳樸敦厚有古人風每遇興修公所即慨然倡捐且不辭勞勩如書院試院皆藉董成厥事又捐數百金以新東嶽祠居家以樹德為務構初日園延師課讀尊禮倍加今姪若孫食廩篋貢成均者繼起年七十八而終

歐陽瑩字如玉鄧庠碧落巷人天性淳厚品行端方率子玫閉戶讀書幼年補弟子員克承厥志寺城市於山林且青年失偶終身不為鸞膠續摠計父子生平持己以正接物以和家雖貧不為溫飽計孫璘領鄉薦官嶺南有政聲曾孫新業儒以書法顯後嗣列膠庠世銘書香

姚進爵字天成筠北貼市堆人秉性和平居心孝友出粟救荒捐石修路傳家效忠厚之風教子切義方之訓子孫遊泮登科舉鄉飲者世稱其盛年近八十而終僉云積善之慶

傅賚頡字六美珠湖人幼習舉業與兄四美風雨連床友恭勿替嗣因家政待理遂以督課後昆為拳拳生平樂善好施積而能散其嚴氣正性言物行恒大足為鄉里所矜式今後裔聯翩疊序食饒膠庠皆以為燕詒之明驗云

梁安畿字德耀二都銅湖東溪人敦篤天成孝養肫摯義方之訓倍極周詳其自奉甚約至周急扶危則倒廩傾

囊不惜卿隣德之

楊汝超字聯臣二十二都大路龍口人孝友成性善氣迎人從無輕喜易怒之事有犯以非禮者亦一笑付之不與校居家克勤克儉淡泊自甘至延師課子姪則敬禮逾常歷久勿懈是真能以詩書為燕翼者以故長子登仕籍孫列膠庠人文接踵謂為盛德昌後信然

熊定謨字書三懋瑚之孫太學生性高潔絕俗而篤於倫紀遇有義舉輒毅然為之尤工醫術全活甚眾遇窮賈者出藥餌以拯不少恠惜鄉里咸稱盛德仁濟坊人

吳學漢字雲章南城石橋人天性渾厚孝於親友於兄弟與人交推誠相與無詐偽習鄉黨甚重之惜年未五十而終未竟其用而子右孫箕裘遠紹克振家聲為食報不爽云

王景謨字夏書南城石橋人溫恭質實事八旬父母依依若赤子友于兄弟毫無間言家不豐每遇歉歲常轉移以恤貧困里人稱之惜其嗜學能文以數竒見窘而盛德昌後獲報良為有白云

張大成字遜九張坊人太學生少失怙事孀母極孝凡所施與悉體母意唯恐少拂遇荒年輒傾廩與人不計其值鄉隣賴以調濟者不可勝數且精岐黃術求醫者踵接量其貧苦雖參苓不惜今子孫森立名列膠庠不亦宜乎

幸有祥字吉臨富樓人天性純孝父病篤日夜問視不倦因服藥無效割股和而進之疾遂痊家初貧後頗裕凡宗族鄉黨有空乏者無不解囊相贈當時羣以善士目之今後嗣蕃昌重膺封典授州同鹽大使歲貢以及生監者多人方與未艾人以為積善餘慶之報真不爽云

姚紹誠字秉乾城北貼市堆人性質樸勤儉孝友兼盡內外無間言家非富有遇人以貧乏告輒推解之不少吝而督訓子弟尤孜孜不倦以故弟登虎榜子効鷹揚次子及孫並遊庠序可云積厚流光也年六十而終

右立春字蘭亭遵例捐從九職城西人賦性純厚盡孝盡

弟內外無間言生平力敦古道雖託跡市廛不欺童叟遇人以緩急告輒解囊應之無德色而莫重於外孤之撫城南徐婿物故遺腹生一子家徒四壁幾無所依春引為己任撫摩鞠育數載劬勞為亡婿保一綫之系是誠難能而可風者惜未及見外孤成立而卒

傅賚諷字贊侯二十一都珠湖人幼失怙業儒未就刺志躬行兄弟分居一切家產悉推讓不受教人以篤實勤敏為要處事公慎人敬服焉

歐陽瑜字錫三北城碧落巷人賦性淳篤居家孝友促於數學優未售延師課弟聲振菽林子復名登鄉榜其孫若姪列膠庠者不少足徵積善之報

陳書遇號肅齋赤土人弱冠失怙以一身摒擋家務異母兄弟八人怡怡無間二兄嫂早世撫孤姪僅數齡教養兼盡名列成均課督子孫習舉業遇遠近賢達士輒優禮之族中舊有家課久廢為之請宿儒衡文再三興復初不自以為功迄今

封贈兩膺簪纓繼起獲報正未有艾也

王茂椿字壽林大學生官莊人賦性豪邁立品端方所與交者必直諒之董里黨有忿爭事以片語排決靡不帖然自奉淡泊逾常遇修橋梁道路即捐貲首倡不辭勞勤而延師課子敬禮尤為有加年六十七而終子名列梓雅孫枝林立

劉三辰字雲彩挿笏人孝友性成品端履直內外毫無間言本里有斜橋塌為高新兩邑往來要衢獨矢志捐修不遺餘力至今人無病涉利賴田疇鄉里咸德之他如修小橋甃仄路周貧恤置排難解紛善行未易更僕數以故壽終大耋子孫蕃衍而日昌

朱崇義峽嶺人天性醇樸曉大義家有祭費為人所侵漁義首捐田為祭產一倡羣和使春秋不嗟餒而皆義力也家少有而賑窮恤乏未嘗吝其子若姪玉樹林立多所成就寧泚好善之明徵與

熊倬泰字位育三十四都燕窩人自幼尚義鄉里以匱乏告者輒應之有負不能償即焚券人有不平事力為排

解年二十餘鰥居不復娶咸以義夫稱之晚年捐貲立會創修宗祠一力獨任仁孝之思肫然莫釋也

楷達禮字仲和下二十都南山人性純厚樂易和平捺履又極峻潔一言一行皆足為隣里所矜式淡泊自甘終始如一至延師課子必豐廩餼以優待嘗曰子若孫之成敗基此矣後嗣列膠庠者不一而足率能確守其遺規

袁時述崗上人失怙依母天性純孝於其弟篤以友愛弟亡婦寡子幼時述不惜多方保護而安全之且為擇師訓迪其姪得以有成本郡太守陳公有崇樸敦倫之

傳定遠字鎮侯四美之子二十一都珠湖人聰穎嗜學弱

冠補邑庠後乃怡情風雅山水自娛言行必本忠信篤敬人有以貧窘告者輒推解之無德色乾隆丁丑歲公舉鄉飲介賓邑侯聶公匾旌文行足式

戴九萬字鵬程南城上坊人性至孝友于兄弟終始如一財產互相推讓而所識窮乏者必力為周全為人尊師重道士林皆爭慕之今後嗣蕃衍森列膠庠蓋盛德之報云

吳觀德字樹滋弼柵園龍山人幼聰敏有異慧甫弱冠即遊庠三舉不第遂絕意仕進專以引誘後進推獎善類為懷性孝友事母終身不改婉容伯氏卞急順受之而

愛敬不衰於人無城府溫良樂易然未嘗阿附有不善則厲色責之而人不怨為人容儀俊偉學問淵博僅以一衿終時論多惜之後十餘年而其子舉于鄉人以為盛德之報

皮國祐字有秩北城高家巷人移居南城上坊幼失怙家貧事母極孝經營卓立入武庠撫遺姪如己子教之成名處事能克己扶危濟困惟恐不及童修文廟建鳳儀書院皆與有勞勤並捐貲獨力修理街道尤殷殷課子以廩貢選授信豐訓導子孫俱貢成均列庠序能成厥

志年七十四終

陳允發字廷選城南小街人性至孝母病床褥親視湯藥

十八年無懈容其母壽至九十餘歲方終人謂孝感所致至處族里戚友間敦忠秉信講讓型仁遠近尤推重焉今子貢成均孫列庠序識者知其後必昌云

傅經邦字彥士二十一都珠湖人太學生贈修職郎事母能養志歲飢出粟賑恤無德色嘗捐金為人全婚又喜勸讀遇不能給者每資助之構有稽古齋延師講學子孫俱郡庠生

宋七謨字顯之九都慶溪人性孝友事父母得其歡心親死喪費悉措於己毫不以累昆季善醫慕文正公良相良醫之語以濟人利物為心遠邇救活無算初不計利人多感之其子孫繁衍發越未艾年八十二而卒



王耀選字掄元九都穩泉塘人性端方嘖笑不苟比隣朝  
夕非衣冠不見也於屋後東偏構一小齋教諸子脩極  
義方之訓周人緩急解人紛難雖老不懈年七十七一  
堂四代子邑庠孫郡庠食餼

傅凌漢字豐羽國學生二十一都珠湖人幼承父志肄業  
儒林雖終身未獲寸進而講習不倦不以未遇惰厥志  
且素性恬淡一切飲食居處初不計較獨以詩書自樂  
年八十五四代一堂雍雍聚順子國學生長孫授職州  
同次孫授職從九

褚達德字福基下二十都南山人天性醇篤立品端方從  
不干與外事與弟友愛無間待姪輩如子接人以和喜  
怒不形於色遇歲飢糶貸恐後併無預策其饋者既沒  
而人思之

楊汝群字岸臣遵例授從九職二十二都龍口人為人意  
氣豪邁至性纏綿兄弟怡怡雖異爨飲食必與偕待諸  
姪尤為肫摯凡延師課讀捐納前程靡不盡力維持俾  
克就緒而賙貧恤困排難解紛又以見樂善不倦之意  
宜乎一門競爽僉美其有志竟成云

熊定軌字均守懋瑚之孫太學生勤謹篤實有古人風族  
黨中或有不睦每為之勸解人咸信服子次第登仕版  
人以為積善所致南城仁濟坊人

吳學淵字靜及城南石橋人冠帶善士生平舉動不苟慷

慨好義族黨隣里所在奉為矩矱郡守佟公贈以額曰閻闈模範今子孫蕃衍克紹前休食報良有自云

丁月桂字騰萬號小山例授武畧騎尉三十都石亭丁坊人性豪邁敦氣誼為人謀必忠遇有公舉輒毅然自任而不辭乾隆丁未倡修浮橋固惜勞瘁戊申遷建本邑城隍廟一切經營籌畫盡出心裁且捐厚貲以竣其事而初不自以為功至於孝友傳家尊師重道尤其日夕拳拳終始勿懈者以故子姪皆獲所成立卒年七十有六士林悼之

塗福錦字文遠北城縣下人候選縣尉為人渾樸孝事父母躬自儉約一裘三十載有晏子遺風子貢成均孫列膠庠曾元濟濟年八十終

皮正芬字潤言觀東菱塘人具至性孝事孀母友愛弱弟內外無間言置學田於觀西為教育子孫計復於居左造雙澗書塾鄉隣有不能教讀者羣依之他如矜貧恤寡遇荒年輒出其所有以相濟善行不一而足子一太學生一邑庠生諸孫林立入膠庠且有食餼者益厚德之報云

塗顯祖字克謨太學生北城縣下人生平孝友性尤仗義敬慕 闕聖浩氣祀奉不少懈屢次江河遇險神默庇護焉人有不能償者多焚其券雅重師儒慷慨好施其為人類多如此後嗣方興未艾長厚之報信有徵云

傅代祿字勲受二十一都珠湖人性耿介毫不苟取每遇人急則必周之尤專志課子於住居後構一小齋延師備極恭敬所言所行皆能物恆自樹鄉黨中咸推重焉孫世朝字雲瞻四都璵溪人敦行誼冰檠自持路拾遺囊貯數十金守候失者至還之無德色年七十鄉先宦吳公學漸壽以文子貢成均長孫職授登仕郎次孫噪名膠庠人以為有隱德焉

楊宗毅字元有十都滙頭人幼失怙艱辛備嘗克自樹立為人重然諾好施與排紛釋難有古仲連風至若修橋梁平道路置田畝入祠為族中子姪訓讀之資鄉鄰至今誦之

吳化普字德興龍山人性慈祥好急人之難嘗過金陵見夫婦哭極哀壹似重有憂者詢之則五世單傳無子今以負債將鬻妻故不勝其悲耳普憐之代償其值不告姓名而歸至鄉黨戚里酬應又可例推

李芝蔚字石英南城飛仙巷人候選叅軍幼孤苦事母孝生平好善樂施年越四紀逝禪繡佛有蕪晉風尤雅重儒素子貢成均孫食郡餼人咸道長厚之報

吳謙字遜也南城人太學生為人樸實嘗言曰人生粗飯足矣何慕膏粱布衣可矣奚圖文繡壬申歲歉出米減價售族中貧乏者年終七十有三

幸日乾字惕若富樓人秉公尚義慷慨樂施遇人艱難困

苦即解囊相贈毫無吝色性最孝友人無間言少習舉子業為文氣如春水筆若秋霜然竟以不售士林惜之迄今厥後克昌兄弟子孫補博士弟子員貢成均而食廩餼者皆以為積厚流光之驗也

姚紹科字行伯筠北貼市堆人孝親敬長賑飢恤貧解囊息訟好善樂施鄉黨推月旦評篤課後嗣子姪多遊泮水昆季早列賢書卒年五十有六

熊謨泰字賡廷花苑渡人性純篤又極有才弱冠時其父入都効力四譯館以一身肩任家事經畫區處無不曲當而延師課弟為邑諸生尤足深人嘉許乾隆乙酉歲飢盡出所積之穀減價發糶以恤貧乏至今鄉里德之

丁鵬冲字九萬火石丁坊人孝友天賦長厚性成蜚聲庠序有大器之目尤慷慨好義遇公事不惜傾囊歲或歉輒出谷以賑貧乏鄉里咸德之晚耽志林泉惟以督課後嗣為事以故子列膠庠孫多秀俊正見其方興未艾云

傅彩南字道輝十都小塘人幼習舉業以父兄繼歿家務待支遂姑置為人淡泊寧靜天性淳篤事慈親以孝聞撫摩孤姪恩勤倍至而延師課子敬禮尤屬逾常人以緩急告者輒推解之不少吝亦無德色鄉里至今稱之卒年六十有三子列成均者二

熊朝鏡字鑑空花苑渡人性至孝友于時篤兄弟不居推

田讓產怡怡之愛數十年如一日又樂善不倦于濟渡  
通衢見有仄陷不平處輒捐貲修葺併安杠梁以利往  
來世皆稱為長者以故子孫繁衍代列青衿固非忠厚  
之報

彭大信字德孚西南廂人居三十八都蛇妃嶺天性孝友  
少業儒為太學生隨仲兄遊南楚兄以疾卒扶襯歸塋  
哀毀骨立家務一力獨持待嫂如母撫諸姪如子居嘗  
言范希文義田麥舟事津津擊節多見諸實行今後嗣  
振藻執林貢名成均者不一而足

何鴻年字凌漢太學生南塘人事父母以養志稱兄弟一  
堂和樂且就周恤困乏不矜不吝里黨咸矜式之讀  
力學為文典瞻屢試弗售乃勵志課子及孫口講手畫  
老而不倦今其裔蜚聲黌序天之所以厚善人者正未  
有艾云

程仕高字萬上四都瑛溪人純謹篤實以孝友稱口訥不  
多言言出而人信服無間子貢成均日切切以敦睦為  
庭訓至沒世而長厚之名在人口碑

况嗣侯字奇玉城北筠西人幼習詩書因早失怙遂棄舉  
業其天性孝友古道力敦族黨有事闕大義者輒毅然  
身任之而不辭晚年構家塾以課子孫創祠堂以祀先  
祖尤不惜其勞瘁迄今後嗣蕃衍貢成均赴賓筵列膠  
庠食廩饋桂蘭濟濟僉云積善餘慶方興未艾焉

塗景鉉字大受太學生縣下人遷居南城上坊和平樂易孝友天成且善知人有氣概為其所交者憂樂與共終始惟一不以存歿貳其心焉

吳良金字玉士號相亭南城禮義坊人太學生為人孝友性峭直瞻其範者咸敬憚之至與人交則又和氣可挹藹然如坐春風中居恒通有無賑窮乏乾隆壬申歲飢出粟以惠宗黨將告匱復解囊購粟為接濟資族人戴其德子四伯筮仕粵東仲筮仕閩中俱有政績叔季振響辟雍皆逸才也其發皇正未有艾云

吳振字紹申太學生南城石橋人性至孝兄弟友愛怡怡一堂凡手創之業不言勞動均分時有讓產高風尤奉

奉以詩書為本計數十年來延師課讀維持調護皆毅然身任而不辭為人和平樂易肝胆照人遇有公舉鄉先生必首推之畀以責成他如輕財重義排難解紛芳行所著又未易更僕數以故子舉孝廉姪膺選貢厠膠序而列成均者競爽一門正方興未艾候也惜與修邑乘未及竣事而卒

藍正輔字弼臣三都人幼穎異肆力詩書不遂志乃貢成均為人忠厚性成三尺童子不忍欺人咸稱為長者遇歉歲出穀賑荒鄉隣皆德之母享百齡歡娛不減菜子宜後嗣森列膠庠云

彭大健字賢初城北碧落山人例授參軍性孝友言笑不

尚周恤窮困一日遇毆傷者命懸危急即給人參以濟之不計其償有稱貸者貧不能耐悉焚其券子二長貢成均幼習舉業鄉黨咸稱之

藍佳遇三都藍坊人也性至孝讀書以敦行為本而質尤穎悟工詩畫世咸以長康目之生平好施予有貧乏者輒多賙恤未嘗以德色示人居鄉黨恂恂若不自足以數奇屢試不售貢入成均壽臻百歲五世同堂子孫林立其名登國籍身入黃宮者方未有艾焉

涂芳字香野號蘭亭往溪人生穎異嗜學不倦補邑弟子員癸酉己卯累荐弗售其志未嘗少懈創立毓蘭書屋課讀兒孫今繼膠庠者接踵生平樂善好施周急扶危

施棺殯修橋路美行不可勝紀年六十而終以長子急

公 勅贈儒林郎

謝廷樹字德滋太學生二十七都溪頭人居家孝友然諾弗欺遇人有爭忿輒多方排釋雖解囊不吝乙未歲飢有力不能購米者復出食穀煮粥濟之里黨中賴以安全者甚衆且延名師課子若姪詩書一時英英玉立咸以為厚德報云

姜承絹字成興潮沙人長厚性成無貳無虞克勤克儉遇鄉鄰有事固結輒捐貲排解歲或荒歉常以贍貧乏毫無德色以故子孫蕃衍登成均遊泮治者代有人人為長厚之報

吳瑛字燦斗南城人幼習舉業不得志遂援例貢成均持  
己則儉樸可風待人則恭敬有度嘗著銘座右深自警  
惕教訓子孫悉凜義方其子今已入泮人以為方興未  
艾云

熊春肇字茂卿花苑渡人賦質聰敏嗜學能文以數竒不  
售遂假吟咏而自適尤性好施與人有夙負詣白其苦  
狀即焚券不取償且解囊助之無德色其為人梗概類  
如此

姚紹謨字顯文筠北貼市堆人孝友端方睦族和隣歲遇  
艱歉恒分食穀以救荒路乏康衢每解囊金而填壑鄉  
邑咸賴之訓課子姪登賢書入膠庠者稱極盛焉公舉

乾隆四十三年鄉飲僕賓邑侯馮公麟以望重賓庭匾  
旌年逾七十而終

彭大儉字介友城北碧落山人太學生秉性孝友居家嚴  
肅生平慷慨尚義遇貧乏輒解囊仗助族隣有不平事  
力為排解無不帖然迺師課子程督維嚴縉紳先生多  
引重之

傅增榮十二都雲堆人性天渾厚孝友備至自父母兄弟  
以及內外人等百有餘口事上使下庭無間言且好行  
其德鄉黨沐解推者不可勝數

彭良桂字燕林城北碧落山人考授經歷生平端方誠懇  
有古君子風家素裕好善樂施凡祠宇道路多為修葺



遇歲歉出谷散給賴全活者甚多阜城門外舊有養濟所仄甚而塌獨捐魚塘基址而重新焉享年六十有四邑侯陳公來元給匾優獎于今子孫蕃衍登仕籍貢成均咸謂盛德之報

熊開海字文瑞四十都官塘人幼莊重長廉介自持以家貧傭書於楚之益陽有艷姬奔馬峻辭拒之次日託故歸居家恂恂孝友為鄉黨所欣慕

李至剛字陶成邑庠生九都人居朝陽門生平為人孝奉高堂至老弗倦任事剛介而和與人平易而嚴遊其門者多發名成業之士年逾七十而終今子若孫均列庠序人羨其方與未艾亦公積累之所致也

姚紹文字字又坡筠北貼市堆人敦孝友勵廉隅解囊息訟好善樂施邑有公事公多與焉如督建鳳儀書院修葺考棚尤著勤勞領鄉荐訓課子姪遊泮登科者濟濟稱盛年終六旬士林重之

黃曰道字貫之十五都江溪橋人為人和易質實與物無忤捐貲建立路亭為行人息肩地并施茶以濟渴樂善之譽往來無間言壽七十有二卒

陳仁炳字文蔚十九都灰埠人工於文援例入太學乾隆辛酉鄉試易二房荐而不售遂輟試築室於梧岡題曰凌雲延師課子太守陳公士璠以便至見其牙籤滿架花草環階欣然樂之因為之記烏程沈泊村先生掌教

豫章伯嗣與受業焉知其文誼甚悉五十初度貽以詩  
曰錦江近接閬仙家雛鳳飛鳴桐有花丹篆吞時才藻  
盛青雲得路海天賒綠衣起舞紫春色賓學徵歌挹瑞  
霞早識穎川門範在仲弓德望史爭誇後伯嗣以拔貢  
歷官黔省冰兢自矢屢著賢聲蓋得於庭訓者不淺

傅代漳字衡又十一都樓下人性磊落少旅京都樂親賢  
士遇本邑公車北上者敬禮有加焉生平孝事父母友  
愛昆弟課子訓孫公門絕跡凡造橋修渡及鄉族有無  
力娶葬者無不欣相樂助壽六十六而終

文智揚字明遠上十三都楓林人性耿介有義舉無不倡  
先說禮款詩至老不倦勸諭鄉隣以敦本力田為務

人以所有不責償質券久則焚之尤不惜多金延師課  
子孫年八十三無病而卒子例授登仕佐郎孫枝繁衍  
多貢成均

何學謙字豫如號吉堂伍橋馬山人性豁達個儻自豪讀  
書惟覽大意於仕進淡如也由國子監應例註詮部授  
布政使司經歷卒不赴篤于孝友內外無間言里中有  
紛爭事片言立解值歲歉出粟以濟人多德之

朱彬字大雅古唐人性孝友少工舉業頗有文名以父疾  
遂棄詩書業岐黃侍奉朝夕調理榮衛數年父疾愈而  
技益精因以濟人罔勿效新吳邑宰趙知希云不為良  
相則為良醫如彬信不誣也因贈以山中宰相額後享

年八十有二著有儒門衛生集嗣梓

涂永徽字慎典往溪人由太學遵例加捐從九職素性純篤儉樸自甘凡鄉黨親友中有匱乏者輒解囊以贈重修府文廟矢公矢慎克襄厥成惜年未五十而卒

文成章字廷奉上十三都楓林人孝友性成居家嚴謹重修宗祠首倡盛舉不辭勞瘁尤喜接文人闢西園書屋廣學田數十畝擇名師訓誨子孫嘗云詩書不貧金玉非富迄今後起多人人以為世德之報

王之璨字粲玉十五都湖東人自幼潛心讀書經史備覽以數竒不獲上進遂淡意功名精醫藥以濟世其為人也嚴氣正性剛直不阿遇歲歉賑粟濟貧排難解紛不留餘力他如平坎河架橋墩施棺柳所費不惜多金里人咸稱美焉

楊振邦字彩美四十一都藻塘人操履剛方生平不受人憐亦耻干人以私性至孝家雖貧甘旨必豐親疾奉侍湯藥累月衣帶不解比卒哀毀骨立一切喪葬不以貧窶廢禮鄉族至今稱之

蕭家茂字恒盛太學生蕭坊社坪人恬靜寡欲里中有忿爭不決者經片言立釋壯年喪妻呱呱在抱以父代母倍極劬勞人有勸之再娶者則曰吾不忍此呱呱者穿蘆花也遂終身不娶

藍天惠三都大成人質淳而性至孝晨昏定省多為人所

難為者一日其父病氣已絕復甦謂惠曰汝吾孝子也  
後必昌言畢即逝今惠家漸盈積子孫賢俊年登大耋  
而卒

賈定遠字又超南鄉畬山人性慇直好讀書以屢試不利  
援例入太學生平不喜人諛遇事處之以公與人孚之  
以信鄉里咸重其為人乾隆四十年舉鄉飲介賓以壽  
終於家

聞克銘字峻德太學生為人器質渾厚樂善好施乾隆癸  
亥年飢瑞城平糶捐穀三百石鄉隣悅服臨終其子甫  
四齡囑其母氏陳妻徐建修龍潭石橋邑令祝公黃溪  
吳駒龍俱有記

塗鈞福字秉公縣下人天性渾樸淡泊寧靜雖處城市若  
山林而孝行尤為篤摯年逾七十事九旬餘歲老母依  
依孺慕奉甘旨必躬親且嬉戲為嬰兒態人咸謂其有  
老萊遺風至今嘖嘖誦之宜乎子孫蕃衍而日熾

姚紹堯字恒發筠北貼市堆人秉性醇篤制行端方孝聲  
克著於家庭懿行遍聞於里黨延師課子子四伯仲均  
領鄉荐幼列膠庠兄弟濟美人仰鳳毛太守陳公澧以  
積厚流光匾旌之卒年六十有七

幸嘉修字迎吉號本齋富樓人性至孝事父母先意承志  
孺慕終身家初貧甫裕隨築別業以課子弟諸姪採芹  
食餼者十三人皆其培植所致而周貧卹園樂善好施

又素性然也乾隆乙亥公舉鄉飲郡伯陳賜德厚凝麻額

聞曰足字欽然桐溪人素性忠厚立品端方族鄰有匱乏輒解囊軫恤雍正丁未撫憲題請授農官匾旌勤儉可風卒年六十有六子孫叠登黌序咸稱善報

涂天信字敦友循例捐從九職三十五都學山人性秉醇厚持身以敬待人以和從不作崖岸態遇歲飢輒出所有以調卹貧困鄉隣德之又好為義舉會建文昌閣護鎮里居外而戒香佛寺與雙峽石橋皆捐資首倡協力重修不辭勞瘁其善行洵有足多者宜乎年登耄耋後嗣繁衍而寢昌

楊顯祖字聿修邑庠生四十六都新塘人孝友成性禮義律身在學數十年從不干預外事惟以教育後昆為本業凡所言所行悉足為鄉黨矜式遇有以貧苦告者輒作解稍吝毫無德色以故子若姪列膠庠貢成均接踵而起皆其燕詒積累之功也卒年七十有四

劉愈昌字中及博聞強記嘗與孝廉雷東甫同學文名不相上下以命相妨屢試不售乃援例入太學好學不倦年踰八十嘯咏不輟號淡軒居士著有淡軒詩文稿至訓子孫以詩書教族人以雍穆薰其德為善良者又未易悉數也

朱淮字桐栢號靜齋一都清湖人性孝友仗義疎財每遇

歲飢出粟以濟貧乏鄉里稱其賢三舉鄉飲辭不就乾隆丁丑邑侯聶舉鄉飲介賓匾旌莪林鼎望年八十九歲而終

謝廷秀字美文二十七都溪頭人太學生性孝友質直好義重然諾樂施與族里有爭者讜論不阿人無不相悅以解咸稱有古人風大宗伯贈以雍宮香藻匾額年七十二終

何錚然字聲先伍橋馬山人生而岐嶷勵志書籍咸以大器目之尋因伯仲早逝親老家繁遂入成均絕意仕進撫孤教子扶困濟急修橋平道以及排難解紛歷有善行里黨咸推重之易箒時呼孫曾告之曰富貴在天汝

曹能以讀書立品為第一着吾瞑目矣時年七十七

徐為質字文彬米峯廟前人幼習舉子業嗜學能文後以家務待理列名成均性孝友內外無間言生平端方自矢古道照人族隣有爭競片語解紛至見人貧窘周恤惟恐後而崇重師儒訓課子姪尤為孜孜勿懈鄉里交口稱之

幸嘉培字因之洪城人孝友克敦持已接物一本至誠鄉黨有爭競者多解囊釋之逢義舉慷慨不辭勞瘁且樂善好學凡名人過訪即樽酒論文兼贈斧資貢成均四十餘年足跡未嘗履公門惟以督課後人為念五子俱在學足徵義方之訓卒年七十有六

李大端字戴初九都墻里人太學生讀書務求根柢作文  
聿追先民應丁卯鄉試卷荐未售後乃專志課子孫至  
老勿倦尤好施與隣里有貧乏者樂於周濟鄉黨皆重  
之年六十有六而卒

常士侯字偉夫南城常家巷人性質直勤儉守己家雖稍  
裕終身不離布素族隣有爭訟者必捐貲解釋而好善  
樂施至老尤弗倦焉壽七十有八

鄔彬字質均號樸園四十三都昴溪人家世業儒早歲入  
成均聰穎秀異長而博學多聞有聲菽苑所交多名下  
士尤好周人急有借貸者如數予之不取券晚精岐黃  
術日以醫藥授人毫不計值其慷慨樂施益天性也

何思義字公慎南山人太學生讀書能見大意舉筆一點  
畫不苟性孝友嘗隻身走四千里外尋兄以慰母心家  
雖不饒施粥施棺無吝意並無德色尤敬禮嚴師益友  
教四子俱貢成均入郡庠卒年六十有七

劉世昌字繼周西陽人為入極孝親老多疾侍奉湯藥衣  
不解帶者數年天資穎異自弱冠受詩書輒明大義壯  
歲乃列成均生平敦尚氣節遇事之可否必以理法相  
繩若聽者循循率教則又霽月光風藹如也晚年積書  
盈架教子成名模範卓然陳木齋先生嘗贈以詩有總  
角挺竒秀厚德含清真事親隆色養至性高古人之句  
享年七十有八

鄒萬遐字大集燕坊人太學生天性孝友善事父母兄弟  
九人同居怡怡幼習舉子業數奇不偶遂紹家傳精醫  
學遠近賴以全活者甚眾又見人飢則給壺餐窮則解  
囊橐周匱濟困以行詎取重於閭里

陳齊松字與憲赤土人太學生性至孝八歲喪母痛哭觸  
棺後見父病遂棄舉子業為商養親事祖母繼母備極  
敬謹至人有急難無不救解遇有公事慨然樂助一日  
有鬻子媳者松曰予贈汝金庶不至臧爾宗祧乎乾隆  
庚子歲病重將危夢有神呼曰汝壽當終念汝事親誠  
篤居心無過許回生現有二子增汝一子明年果生子  
一越數年而卒今子身列成均人以為善行之報

何識讓字允恭伍橋馬山人性誠樸不苟言笑作文不事  
粉飾下筆立就尤篤於孝友慈闈早喪事繼母和兄弟  
人無間言遇貧乏必解囊以濟同學多獲雋數獨奇屈  
就太學澹如也嘗語人曰吾輩讀書豈徒以拾青紫為  
榮哉孝弟忠信吾盡吾分可耳歲乙酉大飢捐粟倡賑  
全活者甚眾鄉人德之子二俱庠生

鄧予傑字俊儒烏峯鄧坊大城人秉性質直持己端方事  
父母以孝聞親病侍奉湯藥三月不解衣帶至處隣里  
鄉黨間必誠必信從不以機巧待人人有以機巧待之  
者初不知覺及其覺也亦一笑付之而迄不與校其器  
量類如此



劉崇晚字大成西陽人事親孝接物誠性嗜學喬居荆楚  
 與一時名人相友善酒酣耳熱仰而賦詩官於荆者無  
 不欽其才品然從不干以私故荆人以周道如砥其直  
 如矢稱之暮年德益進恂恂居鄉睦姻任郵靡所不至  
 尤長於啟迪子孫凜其義方桂蓋蘭芽蔚然秀茁共羨  
 為厚德獲報

金祖留字克謹太平門人祖居廿七都生平厚重簡默樂  
 善好施恒誠諸子弟曰古人云勿以善小而勿為爾曹  
 其勉之家雖不富間以廩餘貸給鄉鄰弗計利力不能  
 償者聽之里有修廢舉墜之務輒捐貲首倡功成併不  
 欲使人知鄉黨以此益重其品概郡伯郭廉得其賢願  
 旌隱德可風洵不愧也歿年七十有二里人思之

王本忠字德泰西湖湖頭人性成孝友內外無間言為人  
 雅尚氣誼族隣有不平者經片語立雪又樂善好施遇  
 歲歉輒減糶以資困乏而開渠引水灌溉田疇尤為一  
 方所利賴閭里至今德之

鄧翹煥字景星烏峯鄧坊大城人太學生襟懷卓犖性情  
 溫和乾隆辛未適修邑乘毅然以本都樂助自任惜不  
 獲觀成而卒臨終尚執此諄諄囑後嗣令其繼述弗廢  
 前功鄉里咸重之

謝恩字君錫太學生二十七都溪頭人好善樂施有負債  
 將鬻妻子者解囊代償無少吝歲飢出粟減價以賙貧

乏且精岐黃術施藥濟人不取值誠一鄉之善士也子  
壬申成進士弟姪俱獲登榜孫曾玉立所謂積德獲報  
於茲信也

熊逢盛字俊公城北高家巷人隱居鄉北觀西恬退力學  
晚年卷不釋手尤酷好作古文體苦心孤詣年九十餘  
未嘗少輟著有餐霞文集十六卷

胡世光一都堆上人生平孝友兼盡樂善好施本里為長  
樂宮朝拜通衢行者數苦泥滓獨力修砌以就平坦復  
倡建祖祠為一門雍穆地其仗義大率類此前命李賜  
匾曰成均英選乾隆戊戌春郡伯祝公舉鄉飲介賓匾  
旌植品端方年躋大耄有六其後嗣貢成均遊泮水領

鄉薦正方興未艾也

何識文字在茲太學生伍橋人幼聰穎讀書能得大意为  
文不蹈故常七試童子不利遂入成均素性豁達有幹  
才最喜作養士類排息紛爭每遇有公舉尤竭力赴之  
不辭勞苦子一邑庠生

張擴字克之四都席溪人自少負氣積學志恢先緒苦產  
事狹遂廢舉業力供子職敦本重倫出於天性撫猶子  
數十年教養姻配勝己出析爨時與七子均產無間言  
解人紛難往返再四不冰釋不已年近八十遺授三子  
邑庠以教讀攸歸無他語及家事

陳永英字含章附貢生赤城洲上人性成孝友經明行修

內外毫無間言又好行其德每遇歲飢輒出所積之穀減價平糶居常待舉火者不下數十家以故諸子及孫俱蜚聲譽序明經繼志盛德獲報正未有艾焉

謝文光字煥章太學生二十七都山裡人秉性剛直立品端方養親盡孝待族以和鄉黨有爭競必捐貲排解凡屬義舉踴躍倡捐務竣其事延師課子慇懃倍常兩嗣俱入太學壽七十有四

魯維榔字陽照二十八都幽嵐人天性純篤事父母孝養備至延名師教子禮意懇懃且好行其德癸亥歲餽割青禾以周急鄰里遇有爭競輒解囊釋之忠厚端方鄉黨推重年七十八終後裔昌熾

熊士鑰字次伯艮山人敦倫善行延師課子若孫遇年飢出粟周恤貧乏鄉鄰有難事無不勸解之二子俱列膠庠後嗣亦極盛焉年七十七而卒

吳昭肖字敬承四都召溪人孝友性成事父母先意承志務得歡心有孀氏早寡以慈母事之保全其節三叔乏嗣立弟為之後待昆季友愛無間數十年如一日每遇歲飢減價糶粟於貧者併不計其值宜乎子孫蕃衍比列諸生咸以為令德所致

何同然字承先伍橋人幼岐嶷性敦實循孝友嘗云文藝末也德行本也淡然功名惟勵志以課子孫尤喜濟人利物仗義急公種種善行不可枚舉若倡修貞烈其著

也宜乎子孫貢成均列膠庠者纍纍焉

王萬年字虎拜郡庠生五溪人性至孝兄弟怡怡終始勿間意氣又極豪邁里中有不平者片言立解人每以陳大邱目之晚年恬退家園日與父老子弟講明孝弟忠信其所燕詒詩書為本善行更足培之斯為積厚流光者與

高自發字啟榮邑之桐溪人性淳樸不事浮華喜讀書善結納作文力追先正應童子試不售因矢志啟後子若孫列成均黌序者代不乏人尤篤意孝友父母昆弟無間言且好善樂施遇歲飢捐粟賑貸解紛難不遺餘力里人稱之歿年九十有五

陳廷軼十九都塔泉人幼失恃事繼母以孝聞母性嚴急軼先意承志每能得其歡心兄弟二人友愛甚篤兄乏嗣軼以子繼之年近八旬夫妻偕老孫曾繞膝四世一堂咸謂孝友之報

徐大儒字文遠後坊人家雖貧事繼母二十餘載菽水承歡不稍懈母疾藥勿效割股以救翼日乃瘞縣尊祝元仁匾旌愚孝性成

吳茲鎮字方伯四都石溪人幼業儒未竟益修謹自力入而家庭出而姻族肫誠長厚生平無不可對人之事其次子職授登仕郎莫非積累之報也卒年七十有六

譔克俊字用章五里人母劉氏矢志相操後以遺腹生天

資穎異讀書過目成誦甫弱冠補博士弟子員蜚聲庠序性至孝事母極得歡心定省溫清數十年如一日歲歉捐館俸以助貧窮而循循善誘里人多受其教益壽逾八十而終宜乎子孫繁衍悉稱賢達云

魯家達字行可幽嵐淇園人性質直制行端方一時輕佻者望而却步家僅給衣食遇路有低滯者輒構石修之雖鬻產以償不惜閭里資其力而稱便者甚多其教育後嗣嘗以德行為本文菽為末諄諄垂訓子孫皆奉為箴銘

熊球字天玉良山人性孝友善讀書飢歲出粟拯救族鄰者四次後嗣繁興咸稱德報八旬時邑侯張匾旌德門

善慶卒年八十有六

朱逢標字彩章黃塘人娶妻吳氏生子甫數月而歿標年二十即誓不再娶人問之輒曰免教此子衣蓋花足矣兄弟五人賴其經理悉得完配年九十而卒兄弟皓首一堂目擊五世孫者有二今後嗣篤儒術登巖序者不乏清江總漕楊公錫紱為之傳

熊遇聖字宗魯郭峯人幼以孝聞父性最嚴而聖獨得歡心尤篤志好學因屢試未售嘗聯登高會以課文凡遊庠諸弟及姪孝廉輩皆親受其業焉賫志以歿而其孝友尤不間於人言云

何至發字時張伍橋人天性孝友事繼母色養倍隆撫諸

季教育兼摯潛心理學恒以督課子孫為要務遇丙丁  
奇荒賑粥活人至今人咸道之子三兩列膠庠一食餼  
孫噪黌宮者三論者謂厚德所致云

熊士琦字瑞玉良山人性剛直公平居家孝友遇橋路傾  
圯輒捐貲以修生平樂善好施凡顛連無告者多方軫  
恤卒年五十有七諸子皆貢成均

蕭繼業字令緒蕭坊人居家和而克忍遇事剛而有斷一  
時鄉隣曲直無不得其平焉雖相持之甚萬不可已亦  
解囊排釋人無知者至於優禮名師結識正士歷久不  
懈

鄔文雲字程萬四十都高沙洲人自幼攻舉子業以數奇

不偶旋棄去束身修行凜凜自持事親極其孝敬友愛  
兄弟情文備至一生慷慨仗義樂善好施遇閭里有爭  
端靡不竭力勸釋無使成訟洵一方之善士云

熊叶吉字禹拜郭峯燕山人性孝友幼穎悟因數奇遂援  
例入成均篤志延師訓其子孫且樂善好施親族有鬻  
妻者代償其負併給食以終每遇歲飢更多方賑濟鄉  
隣愛之今諸孫蜚聲黌宮皆其厚德之報云

吳棠字蔚南邑庠生城南石橋人溧陽公學濂之幼子也  
天性孝友恬淡自如絕無貴介氣習咸以佳公子目之  
晚年嗜古字學尤工凡立心制事悉以忠恕為本而潔  
清自愛等城市於山林其品行洵為卓卓者迄今猶令

人溯洄而不置

熊昭然字周文郭峯人幼失怙事母最孝嗜古力學應試未售遂援例入太學絕意科名留心課子生平儉樸樂善好施其懿行芳躅實有古人遺風今子孫克紹書香厚德之報正未有艾也

鄭和愛字育遂米峯人性仁厚少往寧州路拾遺金即於路旁竚候給還又於寧市拾陳某契紙一包價值千金覲面還之更有扯欠錢糧官逼甚休妻以償其友邀眾歛銀以贖愛聞之概足其數構有星聚堂子四多榮顯熊鳴盛字和聲太學生艮山人尊師重道睦族和鄰倡義禦荒分金贈友鄉黨咸稱人望卒年六十有三

幸嘉猷字克之太學生富樓人素性質直有義槩遇鄉黨善事無不捐貲贊成歲癸亥米價昂貴猷率兄弟半價以糶族隣均沾其利賴其極貧無措者將所有竹山令人恣取竹屑和米作餅食之全活甚眾自後每遇荒年必設法周濟尤拳拳督課子姪終始勿倦遊庠序十餘人隣里皆稱其盛德獲報

鄭汜字有江號敏堂太學生米峯人性沉靜事親克孝待人以誠慷慨仗義倡建米峯之凌雲塔不吝捐金亦不辭勞瘁遇災稔輒輸谷祠內以賑窮乏里人賴之而延師課讀敬禮逾常尤終始勿替故其子登仕籍者三列成均者二人以為仁厚獲報正未艾云

幸有儼字若思富樓人天性孝友事高堂敬養備至待骨肉恩義交孚里黨有忿爭必極力排解而調貧恤乏尤其素性所然誠可謂積厚而流光者宜乎子孫蕃衍貢成均入膠序食廩饒經明行修正方興未艾候也享年八十有七

李文喬字巨材桂塘港里人性慈好義乾隆癸亥歲飢饉傳城南有觀音土可療飢然食而死者相望喬罄所餘之粟煮粥相濟里黨效之活人無算南遊楚漢見沙灘溺屍狼籍市棺掩埋不少吝今子孫衣冠濟楚人皆以為陰德所滋培云

幸徵字聘士富樓人質敏好學勵志上進因數奇遂貢成

均性至孝父病累歲不瘳徵服侍湯藥屢易寒暑不少懈且時默禱願以身代隣有紛爭不惜解囊釋之遇歲飢周乏濟急善行尤不一而足宜乎後裔昌盛積厚而流光焉享年七十有六

褚遠俏字沅茂下二十都南山人率性耿直然諾不欺遇有義舉輒慷慨相從毫無推委意為人循循規矩從不以非禮干人人有以非禮干犯者亦一笑付之而迄不與校其氣量和平又如此

喻汝錦字文成下二十都孫家坊人居心長厚制行端方族黨有不平者經片言立雪人恒以陳太邱目之家泐富有見人貧苦無聊輒量力以為施予所謂樂善不倦



庶幾得其意焉子三俱貢成均孫枝繁衍忠厚之報正未有艾云

鄭州字可居號容齋太學生米峯人氣度和平事父母以孝稱兄弟友愛怡怡如也每遇荒年輒出所餘以濟貧乏不稍吝少客漢口夜有少婦獻媚州堅却之明日遂行後客有寓此者即以是陷人服其節子三俱賢達

黃克忠字翼君太學生五都翰溪人居心愷惻秉性端方家頗裕常出餘租以貸貧乏有力不能償者概不苛求遇鄉隣有忿爭必正言讜論與人排釋人亦靡不帖然尤惓惓於詩書裕後構一學齋督課子姪禮意殷勤歷久而弗替以故子列成均者有人由膠庠而貢者有人謂為積厚流光信然

吳暉吉字中孚太學生四都石溪人居心仁厚立品端方從不以非禮加人人亦無有以非禮干之者受父遺租產其租聽佃人自納不計償甚有業失而田賦留者亦概勿問他如調貧恤寡排難解紛善行又未易更僕數也晚年構一松軒日與二三知己盤桓笑傲拈韻賦詩以樂志僉稱為松軒長者子二俱貢成均

幸日藻字宗鑑富樓人太學生孝友性成品端履直寢居動循禮法待人以和從不作崖岸態鄉里有紛爭輒解囊排釋而周急親朋毫無德色貧士資其膏火成就者實多至延師督課尤極懇懃宜乎子孫並列庠序德厚

流光

陳文燦字漢彩鍾坊人事繼母至孝待兄弟極友鄉鄰有事輒解囊和釋每遇歲荒出粟賑飢一時賴其全活者甚衆至平日尊師重道義方訓子惟以先民是程迄今子孫貢成均蜚聲膠庠者不一咸以為厚報云

吳嘉會字運亨四都石溪人處己謙恭接物和平事父母承歡侍養孺慕篤以終身待諸弟友愛無間尤殷勤課讀不以家務稍撓其念俾得早歲遊庠用慰親心至夫睦姻任恤樂善好施固其素性有然亦由克體庭訓而致也宗族鄉黨迄今嘖嘖稱之

蕭我深字祖述三十一都蕭坊人性孝友待人和平見緩

急輒軫恤之初喬居新昌之找橋村值乾隆壬戌歲大歉以所儲谷數百碩減價而糶人皆德之晚歲家居教課子孫敦崇實學年逾七十無疾而終

楊瑞溥字吉士荷林人性直諒質明敏自幼嗜學能文欲成父志以屢試不售捐授從九品職生平孝友克敦慷慨仗義立家業課子孫鄉里至今稱之

鞠懋嵩字一峯太學生三都甘源人生平慷慨仗義居家嚴肅孝友聞於里黨因數奇不售遂精岐黃救活無筭各憲旌有匾額兩學公舉鄉飲介賓至今子孫昌盛貢成均者有人年踰耄耄不疾而終洵稱齒德兼優者

黃修紱字麟來七都淶江人賦性正直慷慨樂施每遇歉

歲出粟濟窮乏一鄉賴以全活者甚衆子孫蕃衍咸以  
為積善之報

彭永清字周定太學生米峯塘源人天性醇厚才識英明  
甫弱冠代父攝理家務經畫裕如上兄下弟俾得積學  
成名咸登仕籍以慰親心既而家產緣事被抄時家口  
盈百嗷嗷待哺清操心慮患險阻備嘗卒能使就安集  
且教家循循有法二十年來子姪婦女聚順一堂從無  
一詬誶語其修齊之道更為可風者第前以長兄遣戍  
萬里不及親見為恨比兄邀

恩歸里而清已作古人半世賢勞大闕孝友爰撮其梗概而  
志之

幸達道字尊五富樓人素性淳樸事親至孝母有拂意輒  
抱膝長跪回其怒乃止母病親侍湯藥三月衣不解帶  
且焚香默禱願以身代及歿廬墓依依至死不易其處  
聞者為之惻然

姚幅字廣宇由貼市堆遷居城北碧落巷人太學生居家  
孝友立品端方尤好行其德人有負債鬻妻者出金代  
償不責其券併不輕以語人督課二弟遊泮登科接踵  
而起而詩書之澤垂裕更長子由恩貢考授教職公舉  
鄉飲正賓二次咸稱為盛德所報

蔡天球字周尚國學生三十三都墨園人賦性醇篤孝友  
力敦內外無間言其燕貽以詩書為本歷延名師有加

禮能久敬而勿衰遇歲飢輒出所有以濟窮困至平日  
焚券之舉與推解之行亦復不少鄉里至今嘖嘖稱之  
黃廷竟字華實五都翰溪人秉姿英異嗜學能文後因家  
政待理遂不治儒業日以擴充先緒利濟窮困為懷康  
熙丙戌奇荒盡出餘租以賙貧乏轉使自家饔飧欠缺  
而不以介意至若尊禮賢士重然諾慎交遊事父母以  
孝聞待兄弟以友愛是又里黨共切心儀者宜乎後嗣  
寢昌衣冠繼世僉以盛德獲報稱之

張克寬字信民太學生城南朝天坊人幼失怙事母以孝  
聞友愛弱弟怡怡無間弟故撫摩孤姪較己子倍見恩  
勤為人樂易和平從無疾聲遽色而又好行其善張氏

忠厚世傳是能紹家聲於勿替者惜年未及五旬而卒  
梅芳字幽馥二十八都堰溪人生而穎異廿年遊泮孜孜  
好學構草堂於室左與二三同志樽酒論文朱文端公  
便道經其齋相與倡和嘗以大器期之而於綱常倫理  
所關尤兢兢致慎者咸稱為士林楷模焉

鄧萬滄字清夷二十八都英塘牌樓人秉性篤實制行端正  
馭家以嚴待人以寬即或加以無禮每以大度容之遇  
鄰有忿爭輒竭力排釋雖解囊不吝而於孤貧尤時加  
周恤鄉黨目為長厚君子卒年八十有二

范新盡字玉朋長沙舖人性本淳良行尤端方遇貧乏輒  
賙濟之乘義舉輒肩任之族興土木不憚勞勩捐貲以

董其成人皆以為義士嗣後子為嘉賓孫入黌宮皆其厚道之所致也

簡吉字卜臣邑庠生十七都象城人為人敬而無失恭而有禮髦而好學不營世利惟以課子教孫為本業以故後嗣昌盛詩禮傳家列膠庠貢成均者接踵而興皆以為積累所致享年七十有三

簡得志字子成十七都象城人篤于至性中介外和癸亥歲歉罄其所有以貸鄉鄰不計息又好施棺槨修理橋梁道路遇族黨有紛爭必極力排解雖捐貲亦所不吝其善行洵有足多者宜乎子嗣林立辟雍振響郡邑遊庠正方興兆也享年六十有三

成後松字挺秀由城南徙宅壠溪人天性肫誠世傳渾噩舉凡應事接人毫無疾言遽色生平喜成美樂解推厭城紛而居負廓人總莫窺其際其內助亦稱賢子四咸守庭訓仲男職授登仕郎論者謂其天倫中真樂叙也卒年七十餘

徐定顯字榮章米峯窰上人生平至情至性事親孝於繼母尤篤友恭昆季慷慨好義遇公事不惜多金待貧乏每有厚贈未嘗矜德色其為人大概如此人皆羨其後必昌大云

劉宗堯字廣載太學生西陽人幼年嗜學能文因體弱遂援例入成均性至孝事父母及本生父母先意承志盡

得其歡心待兄弟友愛無間饒有薛包風度家素豐裕常以穀為鄉鄰稱貸歲歉雖薄息絕不計償久且焚其券晚年以岐黃術濟人不受報單寒者每贈以貲里閭中至今津津道之

胡銓選字元衡三十八都杭橋人孝友性成躬先實行置祖廟烝嘗修通衢橋路皆獨任而不辭每遇荒歉鄰里待舉火者卽數十家間有典質見人貧苦輒焚其券不計值而給膏火以資人讀謀嫁娶以續人嗣善行尤為足多者宜乎子孫繩繩拖青曳紫一門稱盛楊學師曾以望重香山匾旌之享年八十有四

何守添字明珍四都瓊溪人性和順愜於庭幃尤篤於友愛兄早喪撫姪猶子均產於析爨時無難色亦無間言光明磊落燕居無惰容雖童婦亦敬禮之無敢干以私者子四俱偉器仲男貢成均其支嗣益繁衍行年七十餘以無疾終

黃章良字文選四都下村人稟性孝友制行端方居家極其嚴肅而生平獨慷慨好義有急難者輒多方調恤遇族隣紛爭事竭力排解無不帖然輸服公直之名里黨稱之今子孫蕃衍咸以為長厚之報云

熊玉夫字琢之太學生北鄉源里人幼習舉業因家務繁冗遂援例貢成均然志不少懈延名師以課子孫家頗裕每遇飢歲出谷賑濟併不計其值隣里鄉黨望其舉

火者甚衆迄今子若孫蜚聲庠序方興未艾咸云積德之報

劉通善字暢然西陽人性耿直喜樸崇儉有古人遺風尤敦孝友鄉族奉為楷模且志量恢宏貽謀甚遠創立書院延師課讀敬禮有加今子孫皆嶄然見頭角方興未艾人皆稱為厚德之報云

朱雲會字際之一都清湖人幼習舉業嗜學能文以數奇遂入太學性至孝兄弟怡怡待族黨以和從無疾聲遽色遇有婚姻喪祭力不能支者輒量力周之不少吝至延師課子孫尤慇懃加禮久敬勿衰宜乎後嗣登仕籍貢成均曳紫拖青為一門稱盛

梁天佑字聲樹二都錦溪人賦性純厚持躬循謹待人以誠信然諾不欺一日拾遺金於路必守待還之乃已而起家全憑乎勤儉遇貧乏輒慷慨樂施不少吝惜值歲歉常出粟稱貸不計其償鄉里賴其調劑者甚衆子貢成均迄今人猶稱其盛德

梁懋梅字雪齋二都錦溪人國學生資性穎異鄉先輩皆厚期之事親長以孝友聞母病奉侍湯藥衣不解帶者數月後以哀毀成疾而卒士論惜之

梁安耀字聲顯二都銅湖東溪人也幼習詩書不求聞達長事父母克慰親心乾隆癸亥歲饑發谷數百石以濟鄉隣尊師重道子若孫列膠庠貢成均羣以為長厚報

云

李允錫字均罷北鄉崇里人天性純孝事親敬養有加家頗豐裕每遇饑歲凡貧苦無聊者出粟濟之不計其值且襟懷宏遠別創書屋延名師課子孫致敬盡禮迄今後嗣貢成均蜚聲庠序食廩餼而選明經者正方興未艾也

童大魁字大文北鄉西溪人兄弟友愛聯床課讀以數竒先後貢入成均家素豐積而能散每遇歲飢傾廩賑貸鄉隣有不敷又別為採買以周急乏構創別業延師訓教子孫數十年情文脩至尤為鄉黨所矜式以故子姪七人掇科者二采芹食餼者接踵而興積厚流光洵不奕

云

冷日暉字東旭太學生二十七都前坊人生平忠厚性成克勤克儉遇有貧乏輒周濟之無德色尤隆尊師道以故子列膠庠鄉人稱之

吳夢鳴字伯鵬太學生下十三都樂安人為孝友性成克敦實行歲歉出粟周濟隣里當事重其行舉鄉飲介賓子孫蕃衍都人稱羨弗衰云

傅忠恪十九都九保人賦性仁厚事親孝待友信生平慷慨好義遇貧乏者輒周恤之嘗讀范文正公義田記力仿行之出田六十畝為族中贍學膏火惜未享年人有伯道之傷



蕭家德字立達二十八都湖溪人幼習詩書聰明邁衆以數奇不偶輒棄去生平為人克勤克儉睦族和隣尊賢重道遇有困苦樂為施濟以故桂蘭疊發享年八十有一

朱日暉字旭采古塘人少穎敏博涉多通從新吳帥蘭臯遊極許可屢試不遇仍復留心經學為人居家孝友言行篤實緩急相告賙贈無吝色里黨稱之

黃國華字顯士一都合羅巷人遷居蕭公店性莊重寡言笑延請師傅教訓子孫極其隆重至患難貧苦相賙恤里黨共稱述焉乾隆癸丑縣主俞公廉其實舉為鄉飲者賓

廖文正字肇周南城上坊人科升之長子也生平孝友好善樂施推囊解紛隣族有貧乏者多周給之鰥寡惇獨力不能葬者輒買棺以瘞之至施茶水修道路不一而足邑宰聶公元善贈有孝友足風匾額享年八十有一

劉崇高字克柔西陽人性剛方遇事敢言里黨紛爭常面折無私而事亦多立解好施濟恤貧救乏不計家之有無喜與賢士大夫遊嘗商維揚維揚賢士大夫之貧而不能入都者無不蒙其解囊之惠以故人多譽克柔而克柔彌自下抑今子孫芝蘭競秀知其培植者厚矣

劉美善字遵五西陽人端方正直不隨人俯仰性尤孝友昆季多人皆客於楚公以堂上年老一切問寢視膳以

及課讀課耕等事竭誠盡力不以獨任為辭家頗裕勤儉自持稍有贏餘即不吝推解以故鄉里族黨咸相推重迄今子孫林立蔚然秀發皆公厚德之報

劉熙善字蒂庸西陽人為入正直端方言笑不苟天性至孝事親敬養有加而且慷慨好義遇貧乏周濟絕無吝色壯年艱於嗣晚歲舉三子延師課讀教子成名隣里鄉黨咸謂積厚之報

幸禹謨字敷文祭酒文貞公之裔生而穎異氣質端嚴起居必循禮性至孝乃翁嘗迫於虎父驚呼其名虎即遁去人以為孝行所感生平樂善好施至老不倦族隣待舉火者數十家由俊秀例授儒林郎壽七十卒

甘士橙字雲萬一都清湖人悼父早逝事母極孝友于兄弟培植後人敬宗敦本貽謀合族居趾不吝財亦無德色而且慷慨好義矜孤恤寡無所往而不粹里黨咸稱之

劉發得字德先候選叅軍一都連山人生平孝友賦性耿介矢慎矢公克勤克儉好善樂施推解不吝其于濟棺佈橋諸大端美不勝舉庶幾有宗人長者風今子孫蕃衍其厚報正未有艾也

甘文蓮字儀廷一都清湖人秉性忠厚一生孝友勵志詩書因數竒不遇改事計然策仗義慷慨親族有窮乏者周恤無德色享年六十有餘一門蕃昌子八品冠帶孫

貢太學者多都人頌之

陳遠義字宜也六都大城岡人幼有至性制行淳厚長則成均益修謹自力生平樂易和平內剛外直士林爭相引重其隱德充足以垂裕後昆子三伯仲俱列膠庠幼領鄉薦孫枝秀發有方興未艾象焉年七十餘卒

朱文臣字元會二十二都西溪人生平長厚不與人忤無疾言遽色尤慷慨好義倡修石路行人賴之以故壽躋期頤子孫蕃衍都人至今稱頌弗衰云

傅弼偉字俊卿二十一都珠湖人少穎敏攻舉業後因食指浩繁肅理家政素性耿介慷慨仗義凡有關名教者必殷勤力行之如族衆士多倡首會課成就人材數十

年無倦容以故子列膠庠孫曾玉立識者以為其後必

昌云

朱文星字精一太學生桐墅人天性醇厚悃樸無華尤慷慨樂施不吝所有每遇歉歲極恤罔遺餘力至若平道路之坎坷修溪港之輿梁不一而足迄今孫曾濟濟克紹書香琅玕森立其為厚德獲報者與

高國椿字占先南城東南廂人幼穎異習詩書慈父見背事母至孝遇人忿爭輒片言釋之有魯仲連風常延名師以課子惜未永年迄今子貢成均孫入黌序其厚報洵未艾云

姚紹泰字開三三十四都太平門人性質直樂施與遇公

事踴躍恐後義方教子足為里黨矜式郡守陳澧廉其  
賢以樂善克昌匾旌之卒年八十有三子考授分司皆  
積善之報云

魯德深字彥人二十八都幽嵐人少孤苦事霜母極孝恪  
遵慈訓至於成立生平克勤克儉取予不苟尤隆師重  
道後嗣蕃昌孫曹蜚聲庠序信積厚流光歟

丁昭義字宜也二十三都龍崗人孝事父母友于兄弟遇  
歉歲出米粟以濟貧乏閭里爭訟必解囊釋之課子貢  
南雍孫曾林立人咸稱焉

冷榮祖字繩武太學生二十七都前坊人素性孝友生平  
溫厚有古仁人君子風每遇歉歲輒出粟以濟貧乏至

倡搆宗祠建立書屋諸盛舉不一而足以故弟領鄉薦  
姪輩聲庠序都人咸艷羨弗置云

沈懋勳字惟烈七都淶江人性敏嗜學因理家政輟舉業  
遵例授職州同生平敦孝友仗義輕財凡遇飢寒輒為  
解推廩施櫬以瘞孤苦培植士林於本都倡興會課置  
試館捐貲以勸公事宜後嗣繁衍焉

戴國瑞字祥廷太學生城南上坊人秉性孝友慷慨仗義  
賑卹族隣矜全孤苦尤尊師重道殷殷不倦迄今子孫  
成立識者卜其後必昌大云

傅言什字章彩二十三都太平門人生平孝友秉性耿介  
遇隣族有忿爭者輒解囊以相勸釋人服其公直至持

家儉約訓誨子侄尤為里黨矜式今後嗣繁昌信食報不爽歟

塗樹芳字煥章北城縣下人秉性長厚恪遵祖父遺訓孝於親友于兄弟與人交無欺待戚誼甚厚尤肫肫以教子弟為急務生平克勤克儉丕振家風里黨重之

劉青芳字聯及太學生一都左橋人事親孝兄弟怡怡父嘗病日侍湯藥衣不解帶數年無倦至賑貧恤乏解紛排難有古人風尤殷殷督課弟姪以故列庠序者多鄉黨咸稱之

袁祥松字元興二十三都月潭人秉性孝友品行端方至好施與樂推解善行不勝枚舉以故鄉黨推重今後嗣

繁行其方與正未艾云

吳文相字琢材城南石橋人少孤苦得伯兄以長以教至於成立生平長厚善行多端羣卜其後必昌

歐陽幾字縕光歐陽珍字儒貴碧落巷人一堂孝友無間人言兄得義之體方正不阿弟得仁之體厚重克持璣年九十三卒珍年九十卒迄今教先型者咸嘖嘖首推焉

熊瑞字輯五良山人恬靜寡言不事聲色讀書教子先孝友而後文藝積學弗售澹如也兩次賑粟賴以生全者衆卒年四十有六里黨惜之

歐陽銓字衡臣碧落巷人事親至孝於繼母尤為竭力處

兄弟讓產不爭教子孫持躬以正種種懿行人皆奉為楷模卒年六十有八

丁仕沫字康臣十六都白湖人秉性孝友素懷慷慨每遇窮乏推解勿吝舉凡排難解紛不遺餘力享年九十有二五代同堂孫曾貢成均游泮水人以為積善之報云